

চক্রবাক

কাজী নজরুল ইসলাম

BANGLADARSHAN.COM



ঐ বিজয় রায় চৌধুরী ও ঐ কানন রায় চৌধুরী

(১৯৩০-২০০০/ ১৯৪০-২০১৩)

বাসাংসি জীর্ণানি যথা বিহায়
নবানি গৃহ্নতি নরোহপরাণি।

তথা শরীরানি বিহায় জীর্ণান্যন্যানি
সংযাতি নবানি দেহী॥

As human beings change
their worn out dress; the
ATMA takes a new body,
leaving the old one.

ন জায়তে ম্রিয়তে বা কদাচিৎ
নায়ং ভূত্বা ভবিত্বা বা ন ভূয়ঃ।

অজো নিত্যঃ শাশ্বাতোহয়ং পুরাণো
ন হন্যতে হন্যমানে শরীরে॥

It neither is, nor was, nor
Would it be. It's eternal, does
not die :- only the body dies.

স্বর্গীয় বিজয় রায় চৌধুরী ও কানন রায় চৌধুরী-এর পুণ্য স্মৃতিতে

বিদ্রোহী কবি কাজী নজরুল ইসলামের

‘চক্রবাক’ কবিতাটি উৎসর্গ করেছেন :

ক) সঞ্জয় রায় চৌধুরী (পুত্র)

খ) সোমা রায় চৌধুরী (পুত্রবধু)

গ) শ্রেয়া রায় চৌধুরী (নাতনি)

চিত্তরঞ্জন, পশ্চিম বর্ধমান, পঃ বঃ।

ওগো ও চক্রবাকী

–ওগো ও চক্রবাকী,

তোমারে খুঁজিয়া অন্ধ হলো যে চক্রবাকের আঁখি!
কোথা কোন্ লোকে কোন্ নদীপারে রহিলে গো তারে ভুলে?
হেথা সাথী তব ডেকে ডেকে ফেরে ধরণীর কূলে কূলে।
দিবসে ঘুমালে সব ভুলে যার পাখায় বাঁধিয়া পাখা,
চঞ্চুতে যার আজিও তোমার চঞ্চুর চুমা আঁকা,
‘রোদ লাগে’ বলে যার ডানাতলে লুকাইতে নানা ছলে,
থাকিয়া থাকিয়া উঠিতে কাঁপিয়া তবু কেন পলে পলে;
ভাদরের পারা আদরের ধারা যাচিয়া যাহার কাছে
কাহার পিছনে ছায়াটির মতো ফিরিয়াছ পাছে পাছে,—
আজ সে যে হয় কাঁদিয়া তোমায় দিকে দিকে খুঁজে মরে,
ভীরু মোর পাখি! আঁধারে একাকী কোথা কোন্ বালুচরে?

সাড়া দেয় বন, শন্ শন্ শন্—ঐ শোনো মোর ডাকে,
তটিনীর জল আঁখি ছলছল ফিরে চায় বাঁকে বাঁকে,
ফিরায়ে আমার প্রতিধ্বনিরে সান্ত্বনা দেয় গিরি,
ও-পারের তীরে জিরিজিরি পাতা ঝুরিতেছে ঝিরি ঝিরি।
বিহগীর হয় ঘুম ভেঙে যায় বিহগ-পক্ষ-পুটে,
বলে, ‘বিরহী রে, মোর সুখ-নীড়ে আয় আয় আয় ছুটে!
জুড়াইব ব্যথা, কাঁটা বিঁধে যথা সেথা দিব বুক পেতে,
ঐ কাঁটা লয়ে বিবাগিনী হয়ে উড়ে যাব আকাশেতে!’
ঠোঁট-ভরা মধু আসে কুলবধু, বলে, ‘আঁধারের পাখি,
নিশীথ নিরুমা চোখে নাই ঘুম, করে এত ডাকাডাকি?

চলো তরুতলে, এই অঞ্চলে দিব সুখ-শেজ পাতি,
ভুলের কাননে ফুল তুলে মোরা কাটাইব সারা রাতি!’
অসীম আকাশ আসে মোর পাশ তারার দীপালি জ্বালি,
বলে, ‘পরবাসী! কোথা কাঁদো আসি? হেথা শুধু চোরাবালি!
তোমার কাঁদনে আমার আঙনে নিভে যায় তারা-বাতি,
তুমিও শূন্য আমিও শূন্য, এস মোরা হব সাথী!’...

মানে না পরান, গেয়ে গেয়ে গান কূলে কূলে ফিরি ডাকি,
কোথা কোন্ কূলে রহিলে গো ভুলে আমার চক্রবাকী!

চাহি ও-পারের তীরে,

কভু না পোহায় বিরহের রাতি এতই দীর্ঘ কি রে?
না মিটিতে সাধ বিধি সাধে বাদ, বিরহের যবনিকা
পড়ে যায় মাঝে, নিভে যায় সাঁঝে মিলনের মরু-শিখা।
মিলনের কূল ভেঙে ভেঙে যায় বিরহের স্রোত-বেগে,
অধরের হাসি বাসি হয়ে ওঠে নিশীথ-প্রভাতে জেগে!

একা নদীতীরে গহন তিমিরে আমি কাঁদি মনোদুখে,
হয়তো কোথায় বাঁধিয়া কুলায় তুমি ঘুম যাও সুখে।
আমাদের মাঝে বহিছে যে নদী এ-জীবনে শুকাবে না,
কাটিবে এ নিশি, আসিবে প্রভাত, –যতেক অচেনা চেনা
আসিবে সবাই; আসিবে না তুমি তব চির-চেনা নীড়ে,
এ-পারের ডাক ও-পার ঘুরিয়া এ-পারে আসিবে ফিরে!

হয়তো জাগিয়া দেখিব প্রভাতে, আমারি আঁখির আগে
তুমি যাচিতেছ নবীন সাথীর প্রেম নব অনুরাগে।
জানি গো আমার কাটিবে না আর এই বিরহের নিশি,
খুঁজিবে বৃথাই আঁধারে তোমায় দশদিকে দশ দিশি।

যখন প্রভাতে থাকিব না আমি এই সে নদীর ধারে,
ক্লান্ত পাখায় উড়ে যাব দূর বিস্মরণীর পারে,
খুঁজিতে আমায় এই কিনারায় আসিবে তখন তুমি—
খুঁজিবে সাগর-মরু-প্রান্তর গিরিদরী বনভূমি।
তাহারি আশায় রেখে যাই প্রিয়, ঝরা পালকের স্মৃতি—
এই বালুচরে ব্যথিতের স্বরে আমার বিরহ-গীতি!

যদি পথ ভুলে আস এই কূলে কোনো দিন রাতে রানি,
প্রিয় ওগো প্রিয়, নিও তুলে নিও ঝরা এ পালকখানি।

তোমারে পড়িছে মনে

তোমারে পড়িছে মনে
আজি নীপ-বালিকার ভীৰু-শিহরণে
যুথিকার অশ্রু-সিক্ত ছলছল মুখে
কেতকী-বধূর অবগুণ্ঠিত ও বৃকে—
তোমারে পড়িছে মনে।

হয়তো তেমনি আজি দূর বাতায়নে
ঝিলিঝিলি-তলে
ম্লান লুলিত অঞ্চলে
চাহিয়া বসিয়া আছ একা,
বারেবারে মুছে যায় আঁখি-জল-লেখা।
বারেবারে নিভে যায় শিয়রের বাতি,
তুমি জাগো, জাগে সাথে বরষার রাতি।

সিক্ত-পক্ষ পাখি
তোমার চাঁপার ডালে বসিয়া একাকী
হয়তো তেমনি করি ডাকিছে সাথীরে,
তুমি চাহি আছ শুধু দূর শৈল-শিরে।

তোমার আঁখির ঘন নীলাঞ্জন-ছায়া
গগনে গগনে আজ ধরিয়াছে কায়া।...

আমি হেথা রচি গান নব নীপ-মালা—
স্মরণ-পারের প্রিয়া, একান্তে নিরাদা
অকারণে!—জানি আমি জানি
তোমারে পাব না আমি। এই গান এই মালাখানি
রহিবে তাদেরি কণ্ঠে—যাহাদেরে কভু
চাহি নাই, কুসুমে কাঁটার মতো জড়ায়ে রহিল যারা তবু।
বহে আজি দিশাহারা শ্রাবণের অশান্ত পবন
তারি মতো ছুটে ফেরে দিকে দিকে উচাটন মন,
খুঁজে যায় মোর গীত-সুর
কোথা কোন্ বাতায়নে বসি তুমি বিরহ-বিধুর।

তোমার গগনে নেভে বারেবারে বিজলির দীপ,
আমার অঙ্গনে হেথা বিকশিয়া ঝরে যায় নীপ।

তোমার গগনে ঝরে ধারা অবিরল,
আমার নয়নে হেথা জল নাই, বুকে ব্যথা করে টলমল।
আমার বেদনা আজি রূপ ধরি শত গীত-সুরে
নিখিল বিরহী-কণ্ঠে-বিরহিণী-তব তরে ঝুরে।

এ-পারে ও-পারে মোরা, নাই নাই কূল!
তুমি দাও আঁখি-জল, আমি দিই ফুল।

BANGLADARSHAN.COM

বাদল-রাতের পাখি

বাদল-রাতের পাখি

কবে পোহায়েছে বাদলের রাতি, তবে কেন থাকি থাকি
কাঁদিছ আজিও 'বউ কথা কও' শেফালির বনে একা,
শাওনে যাহারে পেলে না, তারে কি ভাদরে পাইবে দেখা?...
তুমি কাঁদিয়াছ 'বউ কথা কও' সে-কাঁদনে তব সাথে
ভাঙিয়া পড়েছে আকাশের মেঘ গহিন শাওন-রাতে।

বন্ধু বরষা-রাতি

কেঁদেছে যে সাথে সে ছিল কেবল বর্ষা-রাতেরি সাথী!

আকাশের জল-ভারাতুর আঁখি আজি হাসি-উজ্জ্বল;
তেরছ-চাহনি জাদু হানে আজ, ভাবে তনু ঢলঢল।
কমল-দিঘিতে কমল-মুখীরা অধরে হিঙুল মাখে,
আলুথালু বেশ-ভ্রমরে সোহাগে পর্ণ-আঁচলে ঢাকে।
শিউলি-তলায় কুড়াইতে ফুল আজিকে কিশোরী মেয়ে
অকারণ লাজে চমকিয়া ওঠে আপনার পানে চেয়ে।
শালুকের কুঁড়ি গুঁজিছে খোঁপায় আবেশে বিধুরা বধু,
মুকুলি পুষ্প-কুমারীর ঠোঁটে ভরে পুষ্পল মধু।

আজি আনন্দ দিনে

পাবে কি বন্ধু বধুরে তোমার, হাসি দেখে লবে চিনে?
সরসীর তীরে আন্নের বনে আজো যবে ওঠো ডাকি
বাতায়নে কেহ বলে কি, 'কে তুমি বাদল-রাতের পাখি!'
আজো বিনিদ্র জাগে কি সে রাতি তার বন্ধুর লাগি?
যদি সে ঘুমায়-তব গান শুনি চকিতে ওঠে কি জাগি?

ভিন-দেশি পাখি! আজিও স্বপন ভাঙিল না হয় তব,
তাহার আকাশে আজ মেঘ নাই-উঠিয়াছে চাঁদ নব!
ভরেছে শূন্য উপবন তার আজি নব নব ফুলে,
সে কি ফিরে চায় বাজিতেছে হয় বাঁশি যার নদীকূলে?

বাদল-রাতের পাখি!

উড়ে চল-যথা আজো ঝরে জল, নাহিকো ফুলের ফাঁকি!

সুন্ধ রাতে

থেমে আসে রজনীর গীত-কোলাহল,
ওরে মোর সাথী আঁখি-জল,
এইবার তুই নেমে আয়-
অতন্দ্র এ নয়ন-পাতায়!

আকাশে শিশির ঝরে, বনে ঝরে ফুল,
রূপের পালঙ্ক বেয়ে ঝরে এলোচুল;
কোন্ গ্রহে কে জড়ায়ে ধরিছে প্রিয়ায়,
উল্কার মানিক ছিঁড়ে ঝরে পড়ে যায়।

আঁখি-জল, তুই নেমে আয়-
বুক ছেড়ে নয়ন-পাতায়!...
ওরে সুখবাদী!

অশ্রুতে পেলিনে যারে, হাসিতে পাবি কি তার আদি?
আপনারে কতকাল দিবি আর ফাঁকি?
অন্তহীন শূন্যতারে কত আর রাখিবি রে কুয়াশায় ঢাকি?
ভিখারি সাজিলি যদি, কেন তবে দ্বারে
এসে এসে ফিরে যাস নিতি অন্ধকারে?
পথ হতে আন্-পথে কেঁদে যাস লয়ে ভিক্ষা-ঝুলি,
প্রসাদ যাচিস যার তারেই রহিলি শুধু ভুলি?

সকলে জানিবে তোর ব্যথা,
শুধু সে-ই জানিবে না কাঁটা-ভরা ক্ষত তোর কোথা?
ওরে ভীৰু, ওরে অভিমানী!

যাহারে সকল দিবি, তারে তুই দিলি শুধু বাণী?
সুরের সুরায় মেতে কতটুকু কমিল রে মর্মদাহ তোর?
গানের গহীনে ডুবে কতদিন লুকাইবি এই আঁখি-লোর?
কেবলি গাঁথিলি মালা, কার তরে কেহ নাহি জানে!

অকূলে ভাসায়ে দিস, ভেসে যায় মালা শূন্য-পানে।

সে-ই শুধু জানিল না, যার তরে এত মালা-গাঁথা,

জলে-ভরা আঁখি তোর, ঘুমে-ভরা তার আঁখি-পাতা,
কে জানে কাটিবে কি না আজিকার অন্ধ এ নিশীথ,
হয়তো হবে না গাওয়া কাল তোর আধো-গাওয়া গীত,
হয়তো হবে না বলা, বাণীর বুদ্ধে যাহা ফোটে নিশিদিন!
সময় ফুরায়ে যায়-ঘনায়ে আসিল সন্ধ্যা কুহেলি-মলিন!

সময় ফুরায়ে যায়, চল্ এবে, বল্ আঁখি তুলি-
ওগো প্রিয়, আমি যাই, এই লহ মোর ভিক্ষা-ঝুলি!
ফিরেছি সকল দ্বারে, শুধু তব ঠাঁই
ভিক্ষা-পাত্র লয়ে করে কভু আসি নাই।

ভরেছে ভিক্ষার ঝুলি মানিকে মণিতে,
ভরে নাই চিত্ত মোর! তাই শূন্য-চিত্তে
এসেছি বিবাগী আজি, ওগো রাজ-রানি,
চাহিতে আসিনি কিছু! সঙ্কোচে অঞ্চল মুখে দিও নাকো টানি।

জানাতে এসেছি শুধু-অন্তর-আসনে
সব ঠাঁই ছেড়ে দিয়ে-যাহারে গোপনে
চলে গেছি বন-পথে একদা একাকী,
বুক-ভরা কথা লয়ে-জল-ভরা আঁখি।

চাহিনিকো হাত পেতে তারে কোনোদিন,
বিলায়ে দিয়েছি তারে সব, ফিরে পেতে দিইনিকো ঋণ!

ওগো উদাসিনী,

তব সাথে নাহি চলে হাতে বিকিকিনি।
কারো প্রেম ঘরে টানে, কেহ অবহেলে
ভিখারি করিয়া দেয় বহু দূরে ঠেলে!
জানিতে আসিনি আমি, নিমেষের ভুলে
কখনো বসেছ কি না সেই নদী-কূলে,

যার ভাটি-টানে-

ভেসে যায় তরী মোর দূর শূন্য-পানে।

চাহি না তো কোনো কিছু, তবু কেন রয়ে রয়ে ব্যথা করে বুক,

সুখ ফিরি করে ফিরি, তবু নাহি সহ্য যায়
আজি আর এ-দুখের সুখ।...

আপনারে ছলিয়াছি, তোমারে ছলিনি কোনোদিন,
আমি যাই, তোমারে আমার ব্যথা দিয়ে গেলু ঋণ।

BANGLADARSHAN.COM

বাতায়ন-পাশে গুবাক-তরুর সারি

বিদায়, হে মোর বাতায়ন-পাশে নিশীথ জাগার সাথী!
ওগো বন্ধুরা, পাণ্ডুর হয়ে এল বিদায়ের রাত্তি!
আজ হতে হলো বন্ধ আমার জানালার ঝিলিমিলি
আজ হতে হলো বন্ধ মোদের আলাপন নিরিবিলি।...

অস্ত-আকাশ-অলিন্দে তার শীর্ণ কপোল রাখি
কাঁদিতেছে চাঁদ, ‘মুসাফির জাগো, নিশি আর নাহি বাকি।’
নিশীথিনী যায় দূর বন-ছায়, তন্দ্রায় ঢুলুঢুলু,
ফিরে ফিরে চায়, দু’হাতে জড়ায় আঁধারের এলোচুল।—

চমকিয়া জাগি, ললাটে আমার কাহার নিশাস লাগে?
কে করে বীজন তপ্ত ললাটে, কে মোর শিয়রে জাগে?
জেগে দেখি মোর বাতায়ন-পাশে জাগিছ স্বপনচারী

নিশীথ রাতের বন্ধু আমার গুবাক-তরুর সারি!

তোমাদের আর আমার আঁখির পল্লব-কম্পনে
সারা রাত মোরা কয়েছি যে কথা, বন্ধু, পড়িছে মনে!—
জাগিয়া একাকী জ্বালা করে আঁখি আসিত যখন জল,
তোমাদের পাতা মনে হতো যেন সুশীতল করতল
আমার প্রিয়র!—তোমার শাখার পল্লবমর্মর
মনে হতো যেন তারি কণ্ঠের আবেদন সকাতির।
তোমার পাতায় দেখেছি তাহারি আঁখির কাজল-লেখা,
তোমার দেহেরই মতন দীঘল তাহার দেহের রেখা।
তব বির্ বির্ মির্ মির্ যেন তারি কুণ্ঠিত বাণী,
তোমার শাখায় ঝুলানো তারির শাড়ির আঁচলখানি।

—তোমার পাখার হাওয়া

তারি অঙ্গুলি-পরশের মতো নিবিড় আদর-ছাওয়া!

ভাবিতে ভাবিতে ঢুলিয়া পড়েছি ঘুমের শ্রান্ত কোলে,
ঘুমায়ে স্বপন দেখেছি,—তোমারি সুনীল ঝালর দোলে
তেমনি আমার শিখানের পাশে। দেখেছি স্বপনে, তুমি

গোপনে আসিয়া গিয়াছ আমার তপ্ত ললাট চুমি।
হয়তো স্বপনে বাড়ায়েছি হাত লইতে পরশখানি,
বাতায়নে ঠেকি ফিরিয়া এসেছে, লইয়াছি লাজে টানি।
বন্ধু, এখন রুদ্ধ করিতে হইবে সে বাতায়ন!
ডাকে পথ, হাঁকে যাত্রীরা, ‘করো বিদায়ের আয়োজন!’

–আজি বিদায়ের আগে

আমারে জানাতে তোমারে জানিতে কত কি যে সাধ জাগে!
মর্মের বাণী শুনি তব, শুধু মুখের ভাষায় কেন
জানিতে চায় ও বুকের ভাষারে লোভাতুর মন হেন?
জানি–মুখে মুখে হবে না মোদের কোনোদিন জানাজানি,
বুকে বুকে শুধু বাজাইবে বীণা বেদনার বীণাপাণি!
হয়তো তোমারে দেখিয়াছি, তুমি যাহা নও তাই করে,
ক্ষতি কি তোমার, যদি গো আমার তাতেই হৃদয় ভরে?
সুন্দর যদি করে গো তোমারে আমার আঁখির জল,
হারা-মোমতাজে লয়ে কারো প্রেম রচে যদি তাজ-ম’ল,
–বলো তাহে কার ক্ষতি?
তোমারে লইয়া সাজাব না ঘর, সৃজিব অমরাবতী!...

হয়তো তোমার শাখায় কখনো বসেনি আসিয়া পাখি,
তোমার কুঞ্জে পত্রপুঞ্জে কোকিল ওঠেনি ডাকি।
শূন্যের পানে তুলিয়া ধরিয়া পল্লব-আবেদন
জেগেছে নিশীথে জাগেনিকো সাথে খুলি কেহ বাতায়ন।

–সব আগে আমি আসি

তোমারে চাহিয়া জেগেছি নিশীথ, গিয়াছি গো ভালোবাসি!
তোমার পাতায় লিখিলাম আমি প্রথম প্রণয়-লেখা
এইটুকু হোক সান্ত্বনা মোর, হোক বা না হোক দেখা!...

তোমাদের পানে চাহিয়া বন্ধু, আর আমি জাগিব না।
কোলাহল করি সারা দিনমান কারো ধ্যান ভাঙিব না।

–নিশ্চল নিশ্চুপ

আপনার মনে পুড়িব একাকী গন্ধবিধুর ধূপ।

শুধাইতে নাই, তবুও শুধাই আজিকে যাবার আগে—
ঐ পল্লব-জাফরি খুলিয়া তুমিও কি অনুরাগে
দেখেছ আমারে—দেখিয়াছি যবে আমি বাতায়ন খুলি?
হাওয়ায় না মোর অনুরাগে তব পাতা উঠিয়াছে দুলি?
তোমার পাতার হরিৎ আঁচলে চাঁদনি ঘুমাবে যবে,
মূর্ছিতা হবে সুখের আবেশে,—সে আলোর উৎসবে
মনে কি পড়িবে এই ক্ষণিকের অতিথির কথা আর?
তোমার নিশাস শূন্য এ ঘরে করিবে কি হাহাকার?
চাঁদের আলোক বিস্বাদ কি গো লাগিবে সেদিন চোখে?
খড়্খড়ি খুলি চেয়ে রবে দূর অস্ত অলখ-লোকে?

—অথবা এমনি করি

দাঁড়ায়ে রহিবে আপন ধেয়ানে সারা দিনমান ভরি?
মলিন মাটির বন্ধনে বাঁধা হয় অসহায় তরু,
পদতলে ধূলি, উর্ধ্বে তোমার শূন্য গগন-মরু।
দিবসে পুড়িছ রৌদ্রের দাহে, নিশীথে ভিজিছ হিমে,
কাঁদিবারও নাই শক্তি, মৃত্যু-আফিমে পড়িছ বিমে!
তোমার দুঃখ তোমারেই যদি, বন্ধু, ব্যথা না হানে,
কি হবে রিক্ত চিত্ত ভরিয়া আমার ব্যথার দানে!...

* * *

ভুল করে কভু আসিলে স্মরণে অমনি তা যেয়ো ভুলি।
যদি ভুল করে কখনো এ মোর বাতায়ন যায় খুলি,
বন্ধ করিয়া দিও পুন তায়!...তোমার জাফরি-ফাঁকে
খুঁজো না তাহারে গগন-আঁধারে—মাটিতে পেলো না যাকে!

কর্ণফুলী

—ওগো ও কর্ণফুলী,

উজাড় করিয়া দিনু তব জলে আমার অশ্রুগুলি।
যে লোনা জলের সিন্ধু-সিকতে নিতি তব আনাগোনা,
আমার অশ্রু লাগিবে না সখি তার চেয়ে বেশি লোনা!
তুমি শুধু জল করো টলমল; নাই তব প্রয়োজন
আমার দু ফোঁটা অশ্রুজলের এ গোপন আবেদন।
যুগ যুগ ধরি বাড়াইয়া বাহু তব দু ধারের তীর
ধরিতে চাহিয়া পারেনি ধরিতে, তব জল-মঞ্জীর
বাজাইয়া তুমি ওগো গর্বিতা চলিয়াছ নিজ পথে!
কূলের মানুষ ভেসে গেল কত তব এ অকূল স্রোতে!
তব কূলে যারা নিতি রচে নীড় তারাই পেল না কূল,
দিশা কি তাহার পাবে এ অতিথি দু'দিনের বুলবুল!

—বুঝি প্রিয় সব বুঝি,

তবু তব চরে চখা কেঁদে মরে চখীরে তাহার খুঁজি!

* * * * *

তুমি কি পদ্মা, হারানো গোমতী, ভুলে-যাওয়া ভাগীরথী—
তুমি কি আমার বুকের তলার প্রেয়সী অশ্রুমতী?
দেশ দেশ ঘুরে পেয়েছি কি দেখা মিলনের মোহানায়,
স্থলের অশ্রু নিশেষ হইয়া যথায় ফুরায়ে যায়?
ওরে পার্বতী উদাসিনী, বল এ গৃহ-হারাবে বল,
এই স্রোত তোর কোন্ পাহাড়ের হাড়-গলা আঁখি-জল?
বজ্র যাহারে বিঁধিতে পারেনি, উড়াতে পারেনি ঝড়,
ভূমিকম্পে যে টলেনি, করেনি মহাকালের যে ডর,
সেই পাহাড়ের পাষাণের তলে ছিল এত অভিমান?
এত কাঁদে তবু শুকায় না তার চোখের জলের বান?

তুই নারী, তুই বুঝিবি না নদী পাষাণ-নরের ক্লেশ,
নারী কাঁদে—তার সে আঁখিজলের আছে একদিন শেষ।
পাষাণ ফাটিয়া যদি কোনোদিন জলের উৎস বহে,

সে জলের ধারা শাশ্বত হয়ে রয়ে রে চির-বিরহে!
নারীর অশ্রু নয়নের শুধু; পুরুষের আঁখি-জল
বাহিরায় গলে অন্তর হতে অন্তরতম তল!
আকাশের মতো তোমাদের চোখে সহসা বাদল নেমে
রৌদ্রের তাত ফুটে ওঠে সখি নিমিষে সে মেঘ থেমে!

* * *

—ওগো ও কর্ণফুলী!

তোমার সলিলে পড়েছিল কবে কার কান-ফুল খুলি?
তোমার স্রোতের উজান ঠেলিয়া কোন্ তরুণী কে জানে,
'সাম্পান'-নায়ে ফিরেছিল তার দয়িতের সন্ধান?
আনমনা তার খুলে গেল খোঁপা, কান-ফুল গেল খুলি,
সে ফুল যতনে পরিয়া কর্ণে হলে কি কর্ণফুলী?

যে গিরি গলিয়া তুমি বও নদী, সেথা কি আজিও রহি
কাঁদিয়ে বন্দি চিত্রকূটের যক্ষ চির-বিরহী?
তব এত জল একি তারি সেই মেঘদূত-গলা বাণী?
তুমি কি গো তার প্রিয়-বিরহের বিধুর স্মরণখানি?
ঐ পাহাড়ে কি শিরীরে স্মরিয়া ফারেসের ফরমাদ,
আজিও পাথর কাটিয়া করিছে জিন্দেগি বরবাদ?
সারা গিরি হলো শিরী-মুখ হয়, পাহাড় গলিল প্রেমে,
গলিল না শিরী! সেই বেদনা কি নদী হয়ে এলে নেমে?
ঐ গিরি-শিরে মজ্জুন্ কি গো আজিও দিওয়ানা হয়ে
লায়লির লাগি নিশিদিন জাগি ফিরিতেছে রোয়ে রোয়ে?
পাহাড়ের বুক বেয়ে সেই জল বহিতেছ তুমি কি গো?—
দুগ্ধস্তের খোঁজে-আসা তুমি শকুন্তলার মৃগ?
মহাশ্বেতা কি বসিয়াছে সেথা পুণ্ডরীকের ধ্যানে?—
তুমি কি চলেছ তাহারি সে প্রেম নিরুদ্দেশের পানে?—
যুগে যুগে আমি হারিয়ে প্রিয়ারে ধরণীর কূলে কূলে
কাঁদিয়াছি যত, সে অশ্রু কি গো তোমাতে উঠেছে দুলে?

* * *

–ওগো চির উদাসিনী!

তুমি শোনো শুধু তোমারি নিজের বক্ষের রিনি রিনি।
তব টানে ভেসে আসিল যে লয়ে ভাঙা ‘সাম্পান’–তরী,
চাহনি তাহার মুখ-পানে তুমি কখনো করুণা করি।
জোয়ারে সিন্ধু ঠেলে দেয় ফেলে তবু নিতি ভাটি-টানে
ফিরে ফিরে যাও মলিন বয়ানে সেই সিন্ধুরই পানে!
বন্ধু, হৃদয় এমনি অবুঝ কারো সে অধীন নয়!
যারে চায় শুধু তাহারেই চায়–নাহি মানে লাজ ভয়।
বারেবারে যায় তারি দরজায়, বারেবারে ফিরে আসে!
যে আগুনে পুড়ে মরে পতঙ্গ–ঘোরে সে তাহারি পাশে!

তব জলে আমি ডুবে মরি যদি, নহে তব অপরাধ,
তোমার সলিলে মরিব ডুবিয়া, আমারি সে চির-সাধ!
আপনার জ্বালা মিটাতে এসেছি তোমার শীতল তলে,
তোমারে বেদনা হানিতে আসিনি আমার চোখের জলে!
অপরাধ শুধু হৃদয়ের সখি, অপরাধ কারো নয়!
ডুবিতে যে আসে ডোবে সে একাই, তটিনী তেমনি বয়!

* * *

সারিয়া এসেছি আমার জীবনে কূলে ছিল যত কাজ,
এসেছি তোমার শীতল নিতলে জুড়াইতে তাই আজ।
ডাকোনিকো তুমি, আপনার ডাকে আপনি এসেছি আমি
যে বুকের ডাক শুনেছি শয়নে স্বপনে দিবস-যামী।
হয়তো আমারে লয়ে অন্যের আজো প্রয়োজন আছে,
মোর প্রয়োজন ফুরাইয়া গেছে চিরতরে মোর কাছে!

–সে কবে বাঁচিতে চায়,

জীবনের সব প্রয়োজন যার জীবনে ফুরায়ে যায়!

জীবন ভরিয়া মিটায়ছি শুধু অপরের প্রয়োজন,
সবার খোরাক জোগায়ে নেহারি উপবাসী মোরই মন!
আপনার পানে ফিরে দেখি আজ–চলিয়া গেছে সময়,
যা হারাবার তা হারাইয়া গেছে, তাহা ফিরিবার নয়!

হারায়েছি সব, বাকি আছি আমি, শুধু সেইটুকু লয়ে
বাঁচিতে পারি না, যত চলি পথে তত উঠি বোঝা হয়ে!

বহিতে পারি না আর এই বোঝা, নামানু সে ভার হেথা;
তোমার জলের লিখনে লিখিনু আমার গোপন ব্যথা!
ভয় নাই প্রিয়, নিমিষে মুছিয়া যাইবে এ জল-লেখা,
তুমি জল-হেথা দাগ কেটে কভু থাকে না কিছুরি রেখা!
আমার ব্যথায় শুকায়ে যাবে না তব জল কাল হতে,
ঘূর্ণাবর্ত জাগিবে না তব অগাধ গভীর স্রোতে।
হয়তো ঈষৎ উঠিবে দুলিয়া, তারপর উদাসিনী,
বহিয়া চলিবে তব পথে তুমি বাজাইয়া কিঙ্কিণী!
শুধু লীলাভরে তেমনি হয়তো ভাঙিয়া চলিবে কুল,
তুমি রবে, শুধু রবে নাকো আর এ গানের বুলবুল!

তুষার-হৃদয় অকরণা ওগো, বুঝিয়াছি আমি আজি-
দেউলিয়া হয়ে কেন তব তীরে কাঁদে 'সাম্পান-মাঝি'!

BANGLADARSHAN.COM

শীতের সিন্ধু

ভুলি নাই পুন তাই আসিয়াছি ফিরে
ওগো বন্ধু, ওগো প্রিয়, তব সেই তীরে!
কূল-হারা কূলে তব নিমেষের লাগি
খেলিতে আসিয়া হয় যে কবি বিবাগী
সকলি হারায় গেল তব বালুচরে, –
ঝিনুক কুড়াতে এসে-গেল আঁখি ভরে
তব লোনা জল লয়ে, –তব স্রোত-টানে
ভাসিয়া যে গেল দূর নিরুদ্দেশ পানে!
ফিরে সে এসেছে আজ বহু বর্ষ পরে,
চিনিতে পারো কি বন্ধু, মনে তারে পড়ে?
বর্ষার জোয়ারে যারে তব হিন্দোলায়
দোলাইয়া ফেলে দিলে দুরাশা-সীমায়,
ফিরিয়া সে আসিয়াছে তব ভাটি-মুখে,
টানিয়া লবে কি আজ তারে তব বুকে?

খেলিতে আসিনি বন্ধু, এসেছি এবার
দেখিতে তোমার রূপ বিরহ-বিথার।
সে-বার আসিয়াছি হুয়ে কুতূহলী,
বলিতে আসিয়া-দিনু আপনারে বলি।
কৃপণের সম আজ আসিয়াছি ফিরে
হারিয়েছি মগি যথা সেই সিন্ধু-তীরে!
ফেরে না তা যা হারায়-মগি হারা ফণী
তবু ফিরে ফিরে আসে! বন্ধু গো, তেমনি
হয়তো এসেছি বৃথা চোরা বালুচরে! –
যে চিতা জ্বলিয়া, –যায় নিভে চিরতরে,
পোড়া মানুষের মন সে মহাশ্মশানে
তবু ঘুরে মরে কেন, –কেন যে কে জানে!
প্রভাতে ঢাকিয়া আসি কবরের তলে
তারি লাগি আধো-রাতে অভিসারে চলে

BANGLADARSHAN.COM

অবুঝ মানুষ, হায়!—ওগো উদাসীন,
সে বেদনা বুঝবে না তুমি কোনোদিন!

হয়তো হারানো মণি ফিরে তারা পায়,
কিন্তু হায়, যে অভাগা হৃদয় হারায়
হারায় সে চিরতরে! এ জনমে তার
দিশা নাহি মিলে বন্ধু!—তুমি পারাবার,
পারাপার নাহি তব, তোমার অতলে
যা ডোবে তা চিরতরে ডোবে আঁখিজলে!
জানিলে সাঁতার, বন্ধু, হইলে ডুবুরি
করিতাম কবে তব বক্ষ হতে চুরি
রত্নহার! কিন্তু হায়, জিনে শুধু মালা
কি হইবে বাড়াইয়া হৃদয়ের জ্বালা!
বন্ধু, তব রত্নহার মোর তরে নয়—
মালার সহিত যদি না মেলে হৃদয়!

BANGLADARSHAN.COM

হে উদাসী বন্ধু মোর, চির আত্মভোলা,
আজ নাই বুকে তব বর্ষার হিন্দোল!
শীতের কুহেলি-ঢাকা বিষণ্ণ বয়ানে
কিসের করুণা মাখা! কূলের শিথানে
এলায়ে শিথিল দেহ আছ একা শুয়ে,
বিশীর্ণ কপোল বালু-উপাধানে থুয়ে!
তোমার কলঙ্কী বঁধু চাঁদ ডুবে যায়
তেমনি উঠিয়া দূর গগন-সীমায়,
ছায়া এসে পড়ে তার তোমার মুকুরে,
কায়াহীন মায়াবীর মায়ী বুকে পুরে
ফুলে ফুলে কূলে কূলে কাঁদো অভিমানে,
আছাড়ি তরঙ্গ-বাহু ব্যর্থ শূন্য পানে।
যে কলঙ্কী নিশিদিন ধায় শূন্য পথে—
সে দেখে না, কোথা, কোন্ বাতায়ন হতে,
কে তারে চাহিছে নিতি! সে খুঁজে বেড়ায়
বুকের প্রিয়ারে ত্যজি পথের প্রিয়ায়!

ভয় নাই বন্ধু ওগো, আসিনি জানিতে
অন্ত তব, পেতে ঠাই অন্তহীন চিতে!
চাঁদ না সে চিতা জ্বলে তব উপকূলে—
কি হবে জানিয়া মোর? কার চিত্তমূলে
কে কবে ডুবিয়া হায়, পাইয়াছে তল?
এক ভাগ থল সেথা, তিন ভাগ জল।

এসেছি দেখিতে তারে সেদিন বর্ষায়
খেলিতে দেখেছি যারে উদ্দাম লীলায়
বিচিত্র তরঙ্গ-ভঙ্গে! সেদিন শ্রাবণে
ছলছল জল-চুড়ি-বলয়-কঙ্কণে
শুনিয়াছি যে-সংগীত, যার তালে তালে
নেচেছে বিজলি মেঘে, শিখী নীপ-ডালে।
যার লোভে অতি দূর অন্তদেশ হতে
ছুটে এসেছি নু এই উদয়ের পথে!—

ওগো মোর লীলা-সার্থী অতীত বর্ষার,
আজিকে শীতের রাতে নব অভিসার!

চলে গেছে আজি সেই বরষার মেঘ,
আকাশের চোখে নাই অশ্রুর উদ্বেগ,
গরজে না গুরু গুরু গগনে সে বাজ,
উড়ে গেছে দূর বনে ময়ূরীরা আজ,
রোয়ে রোয়ে বহে নাকো পুবালি বাতাস,
শ্বসে না ঝাউয়ের শাখে সেই দীর্ঘশ্বাস,
নাই সেই চেয়ে-থাকা বাতায়ন খুলি
সেই পথে—মেঘ যথা যায় পথ ভুলি।
না মানিয়া কাজলের ছলনা নিষেধ
চোখ ছেপে জল ঝরা,—কপোলের স্বেদ
মুছিবর ছলে আঁখি-জল মোছা সেই,
নেই বন্ধু, আজি তার স্মৃতিও সে নেই!

থরথর কাঁপে আজ শীতের বাতাস,
সেদিন আশার ছিল সে দীর্ঘ-শ্বাস—

BANGLADARSHAN.COM

আজ তাহা নিরাশায় কেঁদে বলে, হয়,—
‘ওরে মূঢ়, যে যায় সে চিরতরে যায়!
যাহারে রাখিবি তুই অন্তরের তলে
সে যদি হারায় কভু সাগরের জলে
কে তাহারে ফিরে পায়? নাই, ওরে নাই,
অকূলের কূলে তারে খুঁজিস বৃথাই!
যে-ফুল ফোটেনি ওরে তোর উপবনে
পুবালি হাওয়ার শ্বাসে বরষা-কাঁদনে,
সে ফুল ফুটিবে না রে আজ শীত-রাতে
দু’ফোটা শিশির আর অশ্রুজল-পাতে!’

আমার সান্ত্বনা নাই জানি বন্ধু জানি,
শুনিতে এসেছি তবু—যদি কানাকানি
হয় তব কূলে কূলে আমার সে ডাক!
এ কূলে বিরহ-রাতে কাঁদে চক্রবাক,
ও-কূলে শোনে কি তাহা চক্রবাকী তার?
এ বিরহ একি শুধু বিরহ একার?
কুহেলি-গুণ্ঠন টানি শীতের নিশীথে
ঘুমাও একাকী যবে, নিঃশব্দ সংগীতে
ভরে ওঠে দশ দিক, সে নিশীথে জাগি
ব্যথিয়া ওঠে না বুক কভু কারো লাগি?
গুণ্ঠন খুলিয়া কভু সেই আধো রাতে
ফিরিয়া চাহ না তব কূলে কল্পনাতে?
চাঁদ সে তো আকাশের, এই ধরা-কূলে
যে চাহে তোমায় তারে চাহ না কি ভুলে?

তব তীরে অগস্ত্যের সম লয়ে তৃষা
বসে আছি, চলে যায় কত দিবা-নিশি!
যাহারে করিতে পারি চুমুকেতে পান
তার পদতলে বসি গাহি শুধু গান!
জানি বন্ধু, এ ধরার মৃৎপাত্রখানি
ভরিতে নারিল যাহা—তারে আমি আনি

BANGLADARSHAN.COM

ধরিব না এ অধরে! এ মম হিয়ার
বিপুল শূন্যতা তাহে নহে ভরিবার!
আসিয়াছি কূলে আজ, কাল প্রাতে বুঝে
কূল ছাড়ি চলে যাব দূরে বহুদূরে।

বলো বন্ধু, বলো, জয় বেদনার জয়!
যে-বিরহে কূলে কূলে নাহি পরিচয়,
কেবলি অনন্ত জল অনন্ত বিচ্ছেদ,
হৃদয় কেবলি হানে হৃদয়ে নিষেধ;
যে-বিরহে গ্রহ-তারা শূন্যে নিশিদিন
ঘুরে মরে; গৃহবাসী হয়ে উদাসীন—
উল্কা-সম ছুটে যায় অসীমের পথে,
ছোটে নদী দিশাহারা গিরিচূড়া হতে;
বারেবারে ফোটে ফুল কণ্টক-শাখায়,
বারেবারে ছিঁড়ে যায়, তবু না ফুরায়
মালা-গাঁথা যে-বিরহে, যে-বিরহে জাগে
চকোরী আকাশে আর কুমুদী তড়াগে;
তব বুকে লাগে নিতি জোয়ারের টান,
যে-বিষ পিইয়া কণ্ঠে ফুটে ওঠে গান—
বন্ধু, তার জয় হোক! এই দুঃখ চাহি
হয়তো আসিব পুন তব কূল বাহি।
হেরিব নতুন রূপে তোমারে আবার,
গাহিব নতুন গান। নব অশ্রুহার
গাঁথিব গোপনে বসি। নয়নের ঝারি
বোঝাই করিয়া দিব তব তীরে ডারি।
হয়তো বসন্তে পুন তব তীরে তীরে
ফুটিবে মঞ্জুরী নব শুক্ল তরু-শিরে।
আসিবে নূতন পাখি শুনাইতে গীতি,
আসিবে না শুধু একা তব এ অতিথি!
যে-দিন ও-বুকে তব শুকাইবে জল,
নিদারুণ রৌদ্র-দাহে ধূ ধূ মরুতল

BANGLADARSHAN.COM

পুড়িবে একাকী তুমি মরুদ্যান হয়ে
আসিব সেদিন বন্ধু, মম প্রেম লয়ে!
আঁখির দিগন্তে মোর কুহেলি ঘনায়,
বিদায়ের বংশী বাজে, বন্ধু গো বিদায়!

BANGLADARSHAN.COM

পথচারী

কে জানে কোথায় চলিয়াছি ভাই মুসাফির পথচারী,
দু'ধারে দু'কূল দুঃখ-সুখের-মাঝে আমি স্রোত-বারি!
আপনার বেগে আপনি ছুটেছি জন্ম-শিখর হতে
বিরাম-বিহীন রাত্রি ও দিন পথ হতে আনপথে।
নিজ বাস হলো চির-পরবাস, জনের ক্ষণপরে
বাহিরিনু পথে গিরি-পর্বতে-ফিরি নাই আর ঘরে।
পলাতকা শিশু জন্মিয়াছি গিরি-কন্যার কোলে,
বুকে না ধরিতে চকিতে ত্বরিতে আসিলাম ছুটে চলে।

জননীরে ভুলি যে পথে পলায় মৃগ-শিশু বাঁশি শুনি,
যে পথে পলায় শশকেরা শুনি ঝর্নার বুনবুনি,
পাখি উড়ে যায় ফেলিয়া কুলায় সীমাহীন নভোপানে,
সাগর ছাড়িয়া মেঘের শিশুরা পলায় আকাশ-যানে,-
সেই পথ ধরি পলাইনু আমি! সেই হতে ছুটে চলি
গিরি দরী মাঠ পল্লির বাট সোজা বাঁকা শত গলি।

-কোন গ্রহ হতে ছিঁড়ি

উল্কার মতো ছুটেছি বাহিয়া সৌর-লোকের সিঁড়ি!
আমি ছুটে যাই জানি না কোথায়, ওরা মোর দুই তীরে
রচে নীড়, ভাবে উহাদেরি তার এসেছি পাহাড় চিরে।
উহাদের বধু কলস ভরিয়া নিয়ে যায় মোর বারি,
আমার গহনে গাহন করিয়া বলে সন্তাপ-হারী!
উহারা দেখিল কেবলি আমার সলিলের শীতলতা,
দেখে নাই-জ্বলে কত চিতাঙ্গি মোর কূলে কূলে কোথা!

-হায়, কত হতভাগী-

আমিই কি জানি-মরিল ডুবিয়া আমার পরশ মাগি!
বাজিয়াছে মোর তটে তটে জানি ঘটে ঘটে কিঙ্কিনী,
জল-তরঙ্গে বেজেছে বধুর মধুর রিনিকিঝিনি।
বাজায়েছে বেণু রাখাল-বালক তীর-তরুতলে বসি,

আমার সলিলে হেরিয়াছে মুখ দূর আকাশের শশী।
জানি সব জানি, ওরা ডাকে মোরে দু'তীরে বিছায়ে স্নেহ,
দিঘি হতে ডাকে পদ্মখীরা, 'খির হও বাঁধি গেহ!'

আমি বয়ে যাই-বয়ে যাই আমি কুলুকুলু কুলুকুলু,
শুনি না-কোথায় মোরই তীরে হয় পুরনারী দেয় উলু।
সদাগর-জাদি মণি-মাণিক্যে বোঝাই করিয়া তরী
ভাসে মোর জলে,- 'ছলছল' বলে আমি দূরে যাই সরি!
আঁকড়িয়া ধরে দু'তীর বৃথাই জড়ায়ে তড়ুলতা,
ওরা দেখে নাই আবর্ত মোর, মোর অন্তর-ব্যথা।

লুকাইয়া আসে গোপনে নিশীথে কূলে মোর অভাগিনী,
আমি বলি চল্ ছল্ ছল্ ছল্ ওরে বধু তোরে চিনি!
কূল ছেড়ে আয় রে অভিসারিকা, মরণ-অকূলে ভাসি!
মোর তীরে তীরে আজো খুঁজে ফিরে তোরে ঘরছাড়া বাঁশি।

সে পড়ে বাঁপায়ে জলে,

আমি পথে ধাই-সে কবে হারায় স্মৃতির বালুকা-তলে!

জানি নাকো হয় চলেছি কোথায় অজানা আকর্ষণে,
চলেছি যতই তত সে অথই বাড়ে জল খনে খনে।
সম্মুখ-টানে ধাই অবিরাম, নাই নাই অবসর,
ছুঁইতে হারাই-এই আছে নাই-এই ঘর এই পর!
ওরে চল্ চল্ ছল্ ছল্ কি হবে ফিরায়ে আঁখি?
তোরি তীরে ডাকে চক্রবাকেরে তোরি সে চক্রবাকী!

ওরা সন্ধ্যায় ঘরে ফিরে যায় কূলের কুলায়-বাসী,
আঁচল ভরিয়া কুড়ায়ে আমার কাদায়-ছিটানো হাসি।
ওরা চলে যায়, আমি জাগি হয় লয়ে চিতাঙ্গি শব,
ব্যথা-আবর্ত মোচড় খাইয়া বুকু করে কলরব!

ওরে বেনোজল, ছল্ ছল্ ছল্ ছুটে চল্ ছুটে চল্!
হেথা কাদাজল পঙ্কিল তোরে করিতেছে অবিরল।
কোথা পাবি হেথা লোনা আঁখিজল, চল্ চল্ পথচারী!
করে প্রতীক্ষা তোর তরে লোনা সাত-সমুদ্র-বারি!

মিলন-মোহনায়

হায় হাবা মেয়ে, সব ভুলে গেলি দয়িতের কাছে এসে!
এত অভিমান এত ক্রন্দন সব গেল জলে ভেসে!
কূলে কূলে এত ফুলে ফুলে কাঁদা আছাড়ি-পিছাড়ি তোর,
সব ভুলে গেলি যেই বুক তোর টেনে নিল মনোচোর!
সিন্ধুর বুক লুকাইলি মুখ এমনি নিবিড় করে,
এমনি করিয়া হারাইলি তুই আপনারে চিরতরে—
যে দিকে তাকাই নাই তুই নাই! তোর বন্ধুর বাহু
গ্রাসিয়াছে তোর বুকের পাজরে—ক্ষুধাতুর কাল-রাহু!

বিরহের কূলে অভিমান যার এমনি ফেনায়ে উঠে,
মিলনের মুখে সে ফিরে এমনি পদতলে পড়ে লুটে?
এমনি করিয়া ভাঙিয়া পড়ে কি বুক-ভাঙা কান্নায়,
বুক বুক রেখে নিবিড় বাঁধনে পিষে গুঁড়ো হয়ে যায়?
তোর বন্ধুর আঙুলের ছোঁয়া এমনি কি জাদু জানে,
আবেশে গলিয়া অধর তুলিয়া ধরিলি অধর পানে!
একটি চুমায় মিটে গেল তোর সব সাধ সব তৃষা,
ছিন্ন লতার মতন মুরছি পড়িলি হারিয়ে দিশা!

—একটি চুমার লাগি

এতদিন ধরে এত পথ বেয়ে এলি কি রে হতভাগী?
গাঙ-চিল আর সাগর-কপোত মাছ ধরিবার ছলে,
নিলাজি লো, তোর রঙ্গ দেখিতে বাঁপ দিয়ে পড়ে জলে।
দু'ধারের চর অবাক হইয়া চেয়ে আছে তোর মুখে,
সবার সামনে লুকাইলি মুখ কেমনে বঁধুর বুক?
নীলিম আকাশ ঝুকিয়া পড়িয়া মেঘ-গুণ্ঠন ফেলে
বৌ-ঝির মতো উঁকি দিয়ে দেখে কুতূহলী-আঁখি মেলে।
'সাম্পান'—মাঝি খুঁজে ফেরে তোর ভাটিয়ালি গানে কাঁদি,
খুঁজিয়া নাকাল দু'ধারের খাল—তোর হেরেমের বাঁদি!

হায় ভিখারিনি মেয়ে,

ভুলিলি সবারে, ভুলিলি আপনা দয়িতেরে বুক পেয়ে!

তোরি মতো নদী আমি নিরবধি কাঁদি রে প্রিতম লাগি,
জন্ম-শিখর বাহিয়া চলেছি তাহারি মিলন মাগি!
যার তরে কাঁদি-ধার করে তারি জোয়ারের লোনা জল
তোর মতো মোর জাগে না রে কভু সাধের কাঁদন-ছল।
আমার অশ্রু একাকী আমার, হয়তো গোপনে রাতে
কাঁদিয়া ভাসাই, ভেসে ভেসে যাই মিলনের মোহনাতে,
আসিয়া সেথায় পুন ফিরে যাই।-তোর মতো সব ভুলে
লুটায় পড়ি না-চাহে না যে মোরে তারি রাঙা পদমূলে!
যারে চাই তারে কেবলি এড়াই কেবলি দি তারে ফাঁকি;
সে যদি ভুলিয়া আঁখি পানে চায় ফিরাইয়া লই আঁখি!

-তার তীরে যবে আসি

অশ্রু-উৎসে পাষণ চাপিয়া অকারণে শুধু হাসি!
অভিমনে মোর আঁখিজল জমে করকা-বৃষ্টি সম,
যারে চাই তারে আঘাত হানিয়া ফিরে যায় নির্মম!

BANGLADARSHAN.COM

একা মোর প্রেম ছুটিবে কেবলি নিচু প্রান্তর বেয়ে,
সে কভু উর্ধ্ব আসিবে না উঠে আমার পরশ চেয়ে-
চাহি না তাহারে! বুক চাপা থাক আমার বুকের ব্যথা,
যে বুক শূন্য নহে মোরে চাহি-হব নাকো ভার সেথা!
সে যদি না ডাকে কি হবে ডুবিয়া ও-গভীর কালো নীরে,
সে হউক সুখী, আমি রচে যাই স্মৃতি-তাজ তার তীরে!
মোর বেদনার মুখে চাপিয়াছি নিতি যে পাষণ-ভার
তা দিয়ে রচিব পাষণ-দেউল সে পাষণ-দেবতার!

কত স্রোতধারা হরাইছে কুল তার জলে নিরবধি,
আমি হারালাম বালুচরে তার, গোপন-ফল্গুনদী!

গানের আড়াল

তোমার কণ্ঠে রাখিয়া এসেছি মোর কণ্ঠের গান—
এইটুকু শুধু রবে পরিচয়? আর সব অবসান?
অন্তর-তলে অন্তরতর যে ব্যথা লুকায়ে রয়,
গানের আড়ালে পাও নাই তার কোনোদিন পরিচয়?
হয়তো কেবলি গাহিয়াছি গান, হয়তো কহিনি কথা,
গানের বাণী সে শুধু কি বিলাস, মিছে তার আকুলতা?
হৃদয়ে কখন জাগিল জোয়ার, তাহারি প্রতিধ্বনি
কণ্ঠের তটে উঠেছে আমার অহরহ রনরনি,—
উপকূলে বসে শুনেছ সে সুর, বোঝো নাই তার মানে?
বেঁধেনি হৃদয়ে সে সুর, দুলেছে দুল হয়ে শুধু কানে?

হায়, ভেবে নাই পাই?

যে চাঁদ জাগাল সাগরে জোয়ার, সেই চাঁদই শোনে নাই
সাগরের সেই ফুলে ফুলে কাঁদা কূলে কূলে নিশিদিন?
সুরের আড়ালে মূর্ছনা কাঁদে, শোনে নাই তাহা বীণ?
আমার গানের মালার সুবাস ছুঁল না হৃদয়ে আসি?
আমার বুকের বাণী হলো শুধু তব কণ্ঠের ফাঁসি?

বন্ধু গো যেয়ো ভুলে—

প্রভাত যে হবে বাসি, সন্ধ্যায় রেখো না সে ফুল তুলে!
উপবনে তব ফোটে যে গোলাপ—প্রভাতেই তুমি জাগি
জানি, তার কাছে যাও শুধু তার গন্ধ-সুষমা লাগি।
যে কাঁটা-লতায় ফুটেছে সে-ফুল রক্তে ফাটিয়া পড়ি,
সারা জনমের ক্রন্দন যার ফুটিয়াছে শাখা ভরি—
দেখো নাই তারে!—মিলন-মালার ফুল চাহিয়াছ তুমি,
তুমি খেলিয়াছ বাজাইয়া মোর বেদনার ঝুম্ঝুমি!

ভোলো মোর গান, কি হবে লইয়া এইটুকু পরিচয়,
আমি শুধু তব কণ্ঠের হার, হৃদয়ের কেহ নয়!
জানায়ো আমারে, যদি আসে দিন, এইটুকু শুধু যাচি—
কণ্ঠ পারায়ে হয়েছি তোমার হৃদয়ের কাছাকাছি!

তুমি মোরে ভুলিয়াছ

তুমি মোরে ভুলিয়াছ তাই সত্য হোক!—
সেদিন যে জ্বলেছিল দীপালি-আলোক
তোমার দেউল জুড়ি—ভুল তাহা ভুল!
সেদিন ফুটিয়াছিল ভুল করে ফুল
তোমার অঙ্গনে, প্রিয়! সেদিন সন্ধ্যায়
ভুলে পরেছিলে ফুল নোটন-খোঁপায়!

ভুল করে তুলি ফুল গাঁথি বর-মালা
বেলাশেষে বারেবারে হয়েছ উতলা
হয়তো বা আর কারো লাগি।...আমি ভুলে
নিরুদ্দেশ তরী মোর তব উপকূলে
না চাহিতে বেঁধেছি, গেয়েছি গান
নীলাভ তোমার আঁখি হয়েছিল ম্লান
হয়তো বা অকারণে! গোধূলি-বেলায়
হয়তো বা অকারণে ম্লানিমা ঘনায়
তোমার ও-আঁখিতলে! হয়তো তোমার
পড়ে মনে, কবে যেন কোন্ লোকে কার
বধু ছিলে; তারি কথা শুধু মনে পড়ে!
—ফিরে যাও অতীতের লোক-লোকান্তরে
এমনি সন্ধ্যায় বসি একাকিনী গেহে!
দু'খানি আঁখির দীপ সুগভীর স্নেহে
জ্বলাইয়া থাকো জাগি তারি পথ চাহি!
সে যেন আসিছে দূর তারালোক বাহি
পারাইয়া অসীমের অনন্ত জিজ্ঞাসা,
সে দেখেছে তব দীপ, ধরণীর বাসা!
তারি লাগি থাকো বসি নব বেশ পরি
শাশ্বত প্রতীক্ষমাণা অনন্ত সুন্দরী!
হায়, সেথা আমি কেন বাঁধিলাম তরী,
কেন গাহিলাম গান আপনা পাসরি?

হয়তো সে গান মম তোমার ব্যথায়
বেজেছিল। হয়তো বা লেগেছিল পায়
আমার তরীর ঢেউ। দিয়েছিল ধুয়ে
চরণ-অলক্ত তব। হয়তো বা ছুঁয়ে
গিয়েছিল কপোলের আকুল কুন্তল
আমার বুকের শ্বাস। ও-মুখ-কমল
উঠেছিল রাঙা হয়ে! পদের কেশর
ছুঁইলে দখিনা বায়, কাঁপে থরথর
যেমন কমল-দল ভঙ্গুর মৃগালে
সলাজ সঙ্কোচে সুখে পল্লব-আড়ালে,
তেমনি ছোঁয়ায় মোর শিহরি শিহরি
উঠেছিলে বারেবারে সারা দেহ ভরি!
চেয়েছিলে আঁখি তুলি, ডেকেছিলে যেন
প্রিয় নাম ধরে মোর-তুমি জানো কেন!
তরী মম ভেসেছিল যে নয়ন-জলে
কূল ছাড়ি নেমে এলে সেই সে অতলে।
বলিলে, - ‘অজানা বন্ধু, তুমি কি গো সেই,
জ্বালি দীপ গাঁথি মালা যার আশাতেই
কূলে বসে একাকিনী যুগ যুগ ধরি?
নেমে এসো বন্ধু মোর ঘাটে বাঁধো তরী!’

বিস্ময়ে রহিনু চাহি ও-মুখের পানে
কী যেন রহস্য তুমি-কী যেন কে জানে-
কিছুই বুঝিতে নারি! আহ্বানে তোমার
কেন জাগে অভিমান, জোয়ার দুর্বীর
আমার আঁখির এই গঙ্গা-যমুনায়া।-
নিরুদ্দেশ যাত্রী, হায়, আসিলি কোথায়?
একি তোর ধেয়ানের সেই জাদুলোক,
কল্পনার ইন্দ্রপুরী? একি সেই চোখ
ধ্রুবতারার সম যাহা জ্বলে নিরন্তর
উর্ধ্ব তোর? সপ্তর্ষির অনন্ত বাসর?

BANGLADARSTHAN.COM

কাব্যের অমরাবতী? একি সে ইন্দिरা,
তোরি সে কবিতা-লক্ষ্মী?—বিরহ-অধীরা
একি সেই মহাশ্বেতা, চন্দ্রাপীড়-প্রিয়া?
উন্মাদ ফরহাদ যারে পাহাড় কাটিয়া
সৃজিতে চাহিয়াছিল—একি সেই শিরি?
লায়লি এই কি সেই, আসিয়াছে ফিরি
কায়েসের খোঁজে পুন? কিছু নাহি জানি!
অসীম জিজ্ঞাসা শুধু করে কানাকানি
এপারে ওপারে, হায়!...তুমি তুলি আঁখি
কেবলি চাহিতেছিলে! দিনান্তের পাখি
বনান্তে কাঁদিতেছিলে—‘কথা কও বউ!’
ফাগুন ঝুরিতেছিল ফেলি ফুল-মউ!

কাহারে খুঁজিতেছিলে আমার এ চোখে
অবসান-গোধূলির মলিন আলোকে?
জিজ্ঞাসার, সন্দেহের শত আলো-ছায়া
ও-মুখে সৃজিতেছিল কী যেন কি মায়া!
কেবলি রহস্য হায়, রহস্য কেবল,
পার নাই সীমা নাই অগাধ অতল!
এ যেন স্বপনে-দেখা কবেকার মুখ,
এ যেন কেবলি সুখ কেবলি এ দুখ!
ইহারে দেখিতে হয়—ছোঁয়া নাহি যায়,
এ যেন মন্দার-পুষ্প দেব-অলকায়!
ইহারি স্ফুলিঙ্গ যেন হেরি রূপে রূপে,
নিশীথে এ দেখা দেয় যেন চুপে চুপে
যখন সবারে ভুলি। ধরার বন্ধন
যখন ছিঁড়িতে চাহি, স্বর্গের স্বপন
কেবলি ভুলাতে চায়, এই সে আসিয়া
রূপে রসে গন্ধে গানে কাঁদিয়া হাসিয়া
আঁকড়ি ধরিতে চাহে,—মাটির মমতা!
পরান-পোড়ানি শুধু, জানে নাকো কথা!

BANGLADARSHAN.COM

বুকে এর ভাষা নাই, চোখে নাই জল,
নির্বাক ইঙ্গিত শুধু শান্ত অচপল!
এ বুঝি গো ভাস্করের পাষণ-মানসী
সুন্দর, কঠিন, শুভ্র। ভোরের উষসী,
দিনের আলোর তাপ সহিতে না জানে।
মাঠের উদাসী সুর বাঁশরির তানে,
বাণী নাই, শুধু সুর, শুধু আকুলতা!
ভাষাহীন আবেদন দেহ-ভরা কথা!
এ যেন চেনার সাথে অচেনার মিশা,—
যত দেখি তত হয় বাড়ে শুধু তৃষা।

আসিয়া বসিলে কাছে তৃপ্ত মুক্তানন,
মনে হলো—আমি দিঘি, তুমি পদ্মবন!
পূর্ণ হইলাম আজি, হয় হোক তুল,
যত কাঁটা তত ফুল, কোথা এর তুল?

তোমাতে ঘিরিয়া রবো আমি কালো জল,
তরঙ্গের উর্ধ্ব রবে তুমি শতদল,
পূজারির পুষ্পাঞ্জলি সম। নিশিদিন
কাঁদিব ললাট হানি তীরে তৃপ্তিহীন!
তোমার মৃগাল-কাঁটা আমার পরানে
লুকায়ে রাখিব, যেন কেহ নাহি জানে।

...কত কি যে কহিলাম অর্থহীন কথা,
শত যুগ-যুগান্তরে অন্তহীন ব্যথা।

শুনিলে সে সব জাগি বসিয়া শিয়রে,
বলিলে, ‘বন্ধু গো, হেরো দীপ পুড়ে মরে
তিলে তিলে আমাদের সাথে! আর নিশি
নাই বুঝি, দিবা এলে দূরে যাব মিশি!
আমি শুধু নিশীথের।’ যখন ধরনী
নীলিমা-মঞ্জুষা খুলি হেরে মুক্তামণি
বিচিত্র নক্ষত্রমালা—চন্দ্র-দীপ জ্বালি,
একাকী পাপিয়া কাঁদে ‘চোখ গেল’ খালি,

BANGLADARSHAN.COM

আমি সেই নিশীথের।-আমি কই কথা,
যবে শুধু ফোটে ফুল, বিশ্ব তন্দ্রাহত
হয়তো দিবসে এলে নারিব চিনিতে,
তোমারে করিব হেলা, তব ব্যথা-গীতে
কেবলি পাইবে হাসি সবার সুমুখে,
কাঁদিলে হাসিব আমি সরল কৌতুকে,
মুছাব না আঁখি-জল। বলিব সবায়,
'তুমি শাঙনের মেঘ-যথায় তথায়
কেবলি কাঁদিয়া ফেরো, কাঁদাই স্বভাব!
আমি তো কেতকী নহি, আমার কি লাভ
ওই শাঙনের জলে? কদম্ব যুথীর
সখারে চাহি না আমি। শ্বেত-করবীর
সখি আমি। হেমন্তের সান্ধ্য-কুহেলিতে
দাঁড়াই দিগন্তে আসি, নিরশ্রু-সংগীতে
ভরে ওঠে দশ দিক! আমি উদাসিনী।
মুসাফির! তোমারে তো আমি নাই চিনি!'
ডাকিয়া উঠিল পিক দূরে আত্মবনে
মুহুমুহু কুহুকুহু আকুল নিস্বনে।
কাঁদিয়া কহিনু আমি, 'শুন, সখি শুন,
কাতরে ডাকিছে পাখি কেন পুন পুন!
চলে যাব কোন্ দূরে, স্বরগের পাখি
তাই বুঝি কেঁদে ওঠে হেন থাকি থাকি।
তোমারই কাজল-আঁখি বেড়ায় উড়িয়া,
পাখি নয়-তব আঁখি ওই কোয়েলিয়া!'
হাসিয়া আমার বুক পড়িলে লুটায়,
বলিলে,-'পোড়ারমুখি আত্মবনচ্ছায়ে
দিবানিশি ডাকে, শুনে কান ঝালাপালা!
জানি না তো কুহু-স্বরে বুক ধরে জ্বালা!
উহার স্বভাব এই, তোমারি মতন
অকারণে গাহে গান, করে জ্বালাতন!

BANGLADARSHAN.COM

নিশি না পোহাতে বসি বাতায়ন-পাশে
হলুদ-চাঁপার ডালে, কেবলি বাতাসে
উছ উছ উছ করি বেদনা জানায়!
বুঝিতে নারিনু আমি পাখি ও তোমায়!'

নয়নের জল মোর গেল তলাইয়া
বুকের পাষাণ-তলে। উৎসারিত হিয়া
সহসা হারাল ধারা তপ্ত মরু-মাঝে।
আপনারে অভিশাপি ক্ষমাহীন লাজে!
কহিনু, 'কে তুমি নারী, এ কী তব খেলা?
অকারণে কেন মোর ডুবাইলে ভেলা,
এ অশ্রু-পাথারে একা দিলে ভাসাইয়া?
দু'হাতে আন্দোলি জল কূলে দাঁড়াইয়া,
অকরণা, হাসো আর দাও করতালি!
অদূরে নৌবতে বাজে ইমন-ভূপালি
তোমার তোরণ-দ্বারে কাঁদিয়া কাঁদিয়া,
—তোমার বিবাহ বুঝি? ওই বাঁশুরিয়া
ডাকিছে বন্ধুরে তব?' যুঝি ঢেউ সনে
শুধানু পরাণ-পণে।...তুমি আনমনে
বারেক পশ্চাতে চাহি পড়িলে লুটায়
স্রোতজলে, সাঁতরিয়া আসি মম পাশে
'আমিও ডুবিব সাথে' বলিয়া তরাসে
জড়িয়ে ধরিলে মোরে বাহুর বন্ধনে!...
হইলাম অচেতন!...কিছু নাই মনে
কেমনে উঠিনু কূলে!...কবে সে কখন
জড়াইয়া ধরেছিল মালার মতন
নিশীথে পাথার-জলে,—শুধু এইটুকু
সুখ-স্মৃতি ব্যথা সম চির-জাগরুক
রহিল বুকের তলে!...আর কিছু নাই!...
তোমারে খুঁজিয়া ফিরি এ-কূলে বৃথাই,
হে চির-রহস্যময়ী! ও-কূলে দাঁড়িয়ে

BANGLADARSHAN.COM

তেমনি হাসিছ তুমি সাক্ষ্য-বনছায়ে
চাহিয়া আমার মুখে! তোমার নয়ন
বলিছে সদাই যেন, 'ডুবিয়া মরণ
এবার হলো না, সখা! আজো যার সাধ
বাঁচিতে ধরার 'পরে। স্বপনের চাঁদ
হয়তো বা দিবে ধরা জাগ্রত এ-লোকে,
আসিবে পথিক-বন্ধু হয়ে প্রিয়তম
বুকের ব্যথায় মোর-পুষ্পে গন্ধ সম!
অঞ্জলি হইতে নামি তোমার পূজার
জড়াইয়া রবো বক্ষে হয়ে কণ্ঠহার!'

নিশীথের বুক-চেরা তব সেই স্বর,
সেই মুখ সেই চোখ করুণা-কাতর
পদ্মা-তীরে তীরে রাতে আজো খুঁজে ফিরি!
কত নামে ডাকি তোমা, - 'মহাশ্বেতা, শিরী,
লায়লি, বকৌলি, তাজ, দেবী, নারী, প্রিয়া!
-সাড়া নাহি মিলে কারো! ফুলিয়া ফুলিয়া
বয়ে যায় মেঘনার তরঙ্গ বিপুল,
কখনো এ-কূল ভাঙে কখনো ও-কূল!

পার হতে নারি এই তরঙ্গের বাধা,
ও যেন 'এসো না' বলে পায়ে-ধরে-কাঁদা
তোমার নয়ন-স্রোত! ও যেন নিষেধ
বিধাতার অভিশাপ, অনন্ত বিচ্ছেদ,
স্বর্গ ও মর্তের মাঝে যেন যবনিকা!...
আমাদের ভাগ্যে বুঝি চিররাত্রি লিখা!
নিশীথের চখা-চখি, দুইপারে থাকি
দুইজনে দুইজন ফিরি সদা ডাকি!
কোথা তুমি? তুমি কোথা? যেন মনে লাগে,
কত যুগ দেখি নাই! কত জন্ম আগে
তোমারে দেখেছি কোন্ নদীকূলে গেহে,
জ্বালো দ্বীপ বিষাদিনী ক্লাস্ত দেহে!

BANGLADARSHAN.COM

বারেবারে কাঁপে কর, আকাশ-দীপিকা
কাঁপে তারারাজি-যেন আঁখি-পাতা তব,-
এইটুকু পড়ে মনে! কবে অভিনব
উঠিলে বিকশি তুমি আপনার মাঝে,
দেখি নাই! দেখিব না-কত বিনা কাজে
নিজেরে আড়াল করি রাখিছ সতত
অপ্রকাশ সুগোপন বেদনার মতো।
আমি হেথা কূলে কূলে ফিরি আর কাঁদি,
কুড়িয়ে পাব না কিছু? বুকুে যাহা বাঁধি
তোমার পরশ পাব-একটু সান্ত্বনা!
চরণ-অলক্ত-রাঙা দু'টি বালুকণা,
একটি নূপুর, ম্লান বেগি-খসা ফুল,
কবরীর সৌন্দা-ঘষা পরিমল-ধূল,
আধখানি ভাঙা চুড়ি রেশমি কাচের,
দলিত বিশুদ্ধ মালা নিশি-প্রভাতের,
তব হাতে লেখা মম প্রিয় ডাক-নাম
লিখিয়া ছিঁড়িয়া-ফেলা আধখানি খাম,
অঙ্গের সুরভি-মাখা ত্যক্ত তপ্ত বাস
মহুয়ার মদ সম মদির নিশ্বাস
পূরবের পরিস্থান হতে ভেসে-আসা,-
কিছুই পাব না খুঁজি? কেবলি দুরাশা।
কাঁদিবে পরান ঘিরি? নিরুদ্দেশ পানে।
কেবলি ভাসিয়া যাব শ্রান্ত ভাটি-টানে?
তুমি বসি রবে উর্ধ্ব মহিমা-শিখরে
নিষ্প্রাণ পাষণ-দেবী? কভু মোর তরে
নামিবে না প্রিয়া রূপে ধরার ধূলায়?
লো কৌতুকময়ী! শুধু কৌতুক-লীলায়
খেলিবে আমারে-লয়ে?—আর সবি ভুল?
ভুল করে ফুটেছিলে আঙিনায় ফুল?
ভুল করে বলেছিলে সুন্দর? অমনি—
ঢেকেছে দু'হাতে মুখ ত্বরিতে তখনি!

BANGLADARSHAN.COM

বুঝি কেহ শুনিয়াছে, দেখিয়াছে কেহ
ভাবিয়া আঁধার কোণে লীলায়িত দেহ
লুকাওনি সুখে লাজে? কোন্ শাড়িখানি
পরেছিলে বাছি বাছি সে সন্ধ্যায় রানি?

হয়তো ভুলেছ তুমি, আমি ভুলি নাই!
যত ভাবি ভুল তাহা—তত সে জড়াই
সে ভুলে সাপিনী সম বুকো ও গলায়!
বাসি লাগে ফুলমেলা।—ভুলের খেলায়
এবার খোয়াব সব, করিয়াছি পণ।
হোক ভুল, হোক মিথ্যা, হোক এ স্বপন,
—এইবার আপনারে শূন্য রিক্ত করি
দিয়া যাব মরণের আগে! পাত্র ভরি
করে যাব সুন্দরের করে বিষপান!
তোমাতে অমর করি করিব প্রয়াণ
মরণের তীর্থ-যাত্রী!

ওগো বন্ধু, প্রিয়,
এমনি করিয়া ভুল দিয়া ভুলাইও
বারেবারে জন্মে জন্মে গ্রহে গ্রহান্তরে!
ও-আঁখি-আলোক যেন ভুল করে পড়ে
আমার আঁখির 'পরে। গোধূলি-লগনে
ভুল করে হই বর, তুমি হও ক'নে
ক্ষণিকের লীলা লাগি! ক্ষণিক চমকি
অশ্রুর শ্রাবণ-মেঘে হারাইও সখি!...

তুমি মোরে ভুলিয়াছ, তাই সত্য হোক!
নিশি-শেষে নিভে গেছে দীপালি-আলোক!

সুন্দর কঠিন তুমি পরশ-পাথর,
তোমার পরশ লভি হইনু সুন্দর—
তুমি তাহা জানিলে না!

...সত্য হোক প্রিয়া

দীপালি জ্বলিয়াছিলে—গিয়াছে নিভিয়া!

হিংসাতুর

হিংসাই শুধু দেখেছ এ চোখে? দেখো নাই আর কিছু?
সম্মুখে শুধু রহিলে তাকায়ে, চেয়ে দেখিলে না পিছু!
সম্মুখ হতে আঘাত হানিয়া চলে গেল যে-পথিক
তার আঘাতেরি ব্যথা বুকে ধরে জাগে আজো অনিমিত্ত?

তুমি বুঝিলে না, হয়,

কত অভিমানে বুকের বন্ধু ব্যথা হেনে চলে যায়!

আঘাত তাহার মনে আছে শুধু, মনে নাই অভিমান?
তোমারে চাহিয়া কত নিশি জাগি গাহিয়াছে কত গান,
সে জেগেছে একা—তুমি ঘুমায়েছ বেভুল আপন সুখে,
কাঁটার কুঞ্জ কাঁদিয়াছে বসি সে আপন মনোদুখে,
কুসুম-শয়নে শুইয়া আজিকে পড়ে না সে-সব মনে,
তুমি তো জানো না, কত বিষজ্বালা কণ্টক-দংশনে!

তুমি কি বুঝিবে বালা,

যে আঘাত করে বুকের প্রিয়ারে, তার বুক কত জ্বালা!

ব্যথা যে দিয়াছে—সম্মুখে ভাসে নির্ভুর তার কায়া,
দেখিলে না তব পশ্চাতে তারি অশ্রু-কাতর ছায়া!...
অপরাধ শুধু মনে আছে তার, মনে নাই কিছু আর?
মনে নাই, তুমি দলেছ দু'পায়ে কবে কার ফুলহার?

কাঁদায়ে কাঁদিয়া সে রচেছে তার অশ্রুর গড়ুখাই,
পার হতে তুমি পারিলে না তাহা, সে-ই অপরাধী তাই?
সে-ই ভালো, তুমি চিরসুখী হও, একা সে-ই অপরাধী!
কি হবে জানিয়া, কেন পথে পথে মরুচারী ফেরে কাঁদি!

হয়তো তোমারে করেছে আঘাত, তবুও শুধাই আজি,
আঘাতের পিছে আরো-কিছু কিগো ও-বুকে ওঠেনি বাজি?
মনে তুমি আজ করিতে পারো কি—তব অবহেলা দিয়া
কত সে কঠিন করিয়া তুলেছ তাহার কুসুম-হিয়া?

মানুষ তাহারে করেছে পাষণ-সেই পাষণের ঘায়
মুরছায়ে তুমি পড়িতেছ বলে সেই অপরাধী, হায়?

তাহারি সে অপরাধ-

যাহার আঘাতে ভাঙিয়া গিয়াছে তোমার মনের বাঁধ!

কিন্তু কেন এ অভিযোগ আজি? সে তো গেছে সব ভুলে!

কেন তব আর রুদ্ধ দুয়ার ঘা দিয়া দিতেছ খুলে?

শুধু যে-মালা আজিও নিরালা যত্নে রেখেছ তুলি

ঝরায়ো না আর নাড়া দিয়ে তার পবিত্র ফুলগুলি!

সেই অপরাধী, সেই অমানুষ, যত পারো দাও গালি!

নিভেছে যে-ব্যথা দয়া করে সেথা আগুন দিও না জ্বালি!

‘মানুষ’, ‘মানুষ’ শুনে শুনে নিতি কান হলো ঝালপালা!

তোমরা তারেই অমানুষ বলো-পায়ে দলো যার মালা!

তারি অপরাধ-যে তার প্রেম ও অশ্রুর অপমানে

আঘাত করিয়া টুটায় পাষণ অশ্রু-নিঝর আনে!

কবি অমানুষ-মানিলাম সব! তোমার দুয়ার ধরি

কবি না মানুষ কেঁদেছিল প্রিয় সেদিন নিশীথ ভরি?

দেখেছ ঈর্ষা-পড়ে নাই চোখে সাগরের এত জল?

শুকালে সাগর-দেখিতেছ তার সাহারার মরুতল!

হয়তো কবিই গেয়েছিল গান, সে কি শুধু কথা-সুর?

কাঁদিয়াছিল যে-তোমারি মতো সে মানুষ বেদনাতুর!

কবির কবিতা সে শুধু খেয়াল? তুমি বুঝিবে না, রানি,

কত জ্বাল দিলে উনুনের জলে ফোটে বুদ্ধ-বাণী!

তুমি কি বুঝিবে, কত ক্ষত হয়ে বেণুর বুকুর হাড়ে

সুর ওঠে হায়, কত ব্যথা কাঁদে সুর-বাঁধা বীণা-তারে!

সেদিন কবিই কেঁদেছিল শুধু? মানুষ কাঁদেনি সাথে?

হিংসাই শুধু দেখেছ, দেখোনি অশ্রু নয়ন-পাতে?

আজো সে ফিরিছে হাসিয়া গাহিয়া?—হায়, তুমি বুঝিবে না,

হাসির ফুঁটি উড়ায় যে-তার অশ্রুর কত দেনা!

BANGLADARSHAN.COM

বর্ষা-বিদায়

ওগো বাদলের পরী!

যাবে কোন্ দূরে, ঘাটে বাঁধা তব কেতকী পাতার তরী!
ওগো ও ক্ষণিকা, পুব-অভিসার ফুরাল কি আজি তব?
পহিল্ ভাদরে পড়িয়াছে মনে কোন্ দেশ অভিনব?

তোমার কপোল-পরশ না পেয়ে পাণ্ডুর কেয়া-রেণু,
তোমাতে স্মরিয়া ভাদরের ভরা নদীতটে কাঁদে বেণু।
কুমারীর ভীৰু বেদনা-বিধুর প্রণয়-অশ্রু সম
ঝরিছে শিশির-সিক্ত শেফালি নিশি-ভোরে অনুপম।

ওগো ও কাজল-মেয়ে,

উদাস আকাশ ছলছল চোখে তব মুখে আছে চেয়ে!
কাশফুল সম শুভ্র ধবল রাশ রাশ শ্বেত মেঘে
তোমার তরীর উড়িতেছে পাল উদাস বাতাস লেগে।
ওগো ও জলের দেশের কন্যা! তব ও বিদায়-পথে
কাননে কাননে কদম-কেশর ঝরিছে প্রভাত হতে।
তোমার আদরে মুকুলিতা হয়ে উঠিল যে বল্লরী
তরুর কণ্ঠ জড়াইয়া তারা কাঁদে দিবানিশি ভরি।

‘বৌ-কথা-কও’ পাখি

উড়ে গেছে কোথা, বাতায়নে বৃথা বউ করে ডাকাডাকি।
চাঁপার গেলাস গিয়াছে ভাঙিয়া, পিয়াসী মধুপ এসে
কাঁদিয়া কখন গিয়াছে উড়িয়া কমল-কুমুদী-দেশে।

তুমি চলে যাবে দূরে,

ভাদরের নদী দুকূল ছাপায়ে কাঁদে ছলছল সুরে!

যাবে যবে দূর হিম-গিরি-শিরে, ওগো বাদলের পরি,
ব্যথা করে বুক উঠবে না কভু সেথা কাহারেও স্মরি?
সেথা নাই জল, কঠিন তুষার, নির্মম শুভ্রতা,-
কে জানে কী ভাল বিধুর ব্যথা-না মধুর পবিত্রতা!

সেথা মহিমার উর্ধ্ব শিখরে নাই তরলতা হাসি,
সেথা রজনীর রজনীগন্ধা প্রভাতে হয় না বাসি।
সেথা যাও তব মুখর পায়ের বরষা-নূপুর খুলি,
চলিতে চকিতে চমকি উঠো না, কবরী উঠে না দুলি।

সেথা রবে তুমি ধেয়ান-মগ্না তাপসিনী অচপল,
তোমার আশায় কাঁদিবে ধরায় তেমনি ‘স্ফটিক-জল!’

BANGLADARSHAN.COM

সাজিয়াছি বর মৃত্যুর উৎসবে

দেখা দিলে রাঙা মৃত্যুর রূপে এতদিনে কি গো রানি?

মিলন-গোধূলি-লগনে শুনালে চির-বিদায়ের বাণী।

যে ধূলিতে ফুল ঝরায় পবন

রচিলে সেথায় বাসর-শয়ন,

বারেক কপোলে রাখিয়া কপোল, ললাটে কাঁকন হানি,

দিলে মোর 'পরে সক্রমণ করে কৃষ্ণ কাফন টানি।

নিশি না পোহাতে জাগায়ে বলিলে, 'হলো যে বিদায় বেলা।'

তব ইঙ্গিতে ও-পার হইতে এপারে আসিল ভেলা।

আপনি সাজালে বিদায়ের বেশে

আঁখি-জল মম মুছাইলে হেসে,

বলিলে, 'অনেক হইয়াছে দেরি, আর জমিবে না খেলা!

সকলের বুক পেয়েছ আদর, আমি দিনু অবহেলা।'

'চোখ গেল উছ চোখ গেল' বলে কাঁদিয়া উঠিল পাখি,

হাসিয়া বলিলে, 'বন্ধু, সত্যি চোখ গেল ওর না কি?'

অকূল অশ্রু-সাগর-বেলায়

শুধু বালু নিয়ে যে-জন খেলায়,

কি বলিবে তারে, বিদায়-খনেও ভিজিল না যার আঁখি!

শ্বসিয়া উঠিল নিশীথ-সমীর, 'চোখ গেল' কাঁদে পাখি!

দেখিনু চাহিয়া ও-মুখের পানে-নিরশ্রু নিষ্ঠুর!

বুকে চেপে কাঁদি, প্রিয় ওগো প্রিয়, কোথা তুমি কত দূর?

এত কাছে তুমি গলা জড়াইয়া

কেন হুঁ করে ওঠে তবু হিয়া,

কী যেন কী নাই কিসের অভাব এ বুক ব্যথা-বিধুর!

চোখ-ভরা জল, বুক-ভরা কথা, কণ্ঠে আসে না সুর।

হেনার মতন বক্ষে পিষিয়া করিনু তোমাতে লাল,

ঢলিয়া পড়িলে দলিত কমল জড়ায়ে বাহু-মৃগাল!

কেঁদে বলি, 'প্রিয়া, চোখে কই জল?'

হলো না তো ম্লান চোখের কাজল!'
চোখে জল নাই—উঠিল রক্ত—সুন্দর কঙ্কাল!
বলিলে, 'বন্ধু, চোখেরই তো জল, সে কি রহে চিরকাল?'

ছল ছল ছল কেঁদে চলে জল, ভাঁটি-টানে ছুটে তরী,
সাপিনীর মতো জড়ইয়া ধরে শশীহীন শর্বরী।

কূলে কূলে ডাকে কে যেন, 'পথিক,
আজও রাঙা হয়ে ওঠেনি তো দিক!
অভিমानी মোর! এখনি ছিঁড়িবে বাঁধন কেমন করি?
চোখে নাই জল—বক্ষের মোর ব্যথা তো যায়নি মরি!'

কেমনে বুঝাই কী যে আমি চাই, চির-জনমের প্রিয়া!
কেমনে বুঝাই—এত হাসি গাই তবু কাঁদে কেন হিয়া!
আছে তব বুকে করুণার ঠাঁই,
স্বর্গের দেবী—চোখে জল নাই!

কত জীবনের অভিশাপ এ যে, কতবার জনমিয়া—
পারিজাত-মালা ছুঁতে শুকালে—হারাইলে দেখা দিয়া।

ব্যর্থ মোদের গোধূলি-লগন এই সে জনমে নহে,
বাসর-শয়নে হারায় তোমায় পেয়েছি চির-বিরহে!

কত সে লোকের কত নদনদী
পারায়ে চলেছি মোরা নিরবধি,
মোদের মাঝারে শত জনমের শত সে জলধি বহে।
বারেবারে ডুবি বারেবারে উঠি জন্ম-মৃত্যু-দহে।

বারেবারে মোরা পাষণ হইয়া আপনারে থাকি ভুলি,
ক্ষণেকের তরে আসে কবে ঝড়, বন্ধন যায় খুলি।

সহসা সে কোন্ সন্ধ্যায়, রানি,
চকিতে হয় গো চির-জানাজানি!
মনে পড়ে যায় অভিশাপ-বাণী, উড়ে যায় বুলবুলি।
কেঁদে কও, 'প্রিয়, হেথা নয়, হেথা লাগিয়াছে বহু ধূলি?'

মুছি পথধূলি বুক লবে তুমি মরণের পারে কবে,
সেই আশে, প্রিয়, সাজিয়াছি বর মৃত্যুর উৎসবে!

কে জানিত হয় মরণের মাঝে
এমন বিয়ের নহবত বাজে!
নব-জীবনের বাসর-দুয়ারে কবে 'প্রিয়া' 'বধূ' হবে—
সেই সুখে, প্রিয়া, সাজিয়াছি বর মৃত্যুর উৎসবে!

BANGLADARSHAN.COM

অপরাধ শুধু মনে থাক

মোর অপরাধ শুধু মনে থাক!

আমি হাসি তার আঙনে আমারি

অন্তর হোক পুড়ে থাক!

অপরাধ শুধু মনে থাক!

নিশীথের মোর অশ্রুর রেখা

প্রভাতে কপোলে যদি যায় দেখা,

তুমি পড়িও না সে গোপন লেখা

গোপনে সে লেখা মুছে যাক!

অপরাধ শুধু মনে থাক!

এ উপগ্রহ কলঙ্ক-ভরা

তবু ঘুরে ঘিরি তোমারি এ ধরা,

লইয়া আপন দুখের পসরা

আপনি সে থাক ঘুরপাক!

অপরাধ শুধু মনে থাক!

জ্যোৎস্না তাহার তোমার ধরায়

যদি গো এতই বেদনা জাগায়,

তোমার বনের লতায় পাতায়

কালো মেঘে তার আলো ছাঁক।

অপরাধ শুধু মনে থাক!

তোমার পাখির ভুলাইতে গান

আমি তো আসিনি, হানিনি তো বাণ,

আমি তো চাহিনি, কোনো প্রতিদান,

এসে চলে গেছি নিরবাক।

অপরাধ শুধু মনে থাক!

কত তারা কাঁদে কত গ্রহে চেয়ে

ছুটে দিশাহারা ব্যোমপথ বেয়ে,

তেমনি একাকী চলি গান গেয়ে
তোমারে দিইনি পিছু-ডাক।
অপরাধ শুধু মনে থাক!

কত ঝরে ফুল, কত খসে তারা,
কত সে পাষাণ শুকায় ফোয়ারা,
কত নদী হয় আধ-পথে হারা,
তেমনি এ স্মৃতি লোপ পা'ক।
অপরাধ শুধু মনে থাক!

আঙিনায় তুমি ফুটেছিলে ফুল
এ দূর পবন করেছিল ভুল,
শ্বাস ফেলে চলে যাবে সে আকুল—
তব শাখে পাখি গান গা'ক।
অপরাধ শুধু মনে থাক।

BANGLADARSHAN.COM

প্রিয় মোর প্রিয়, মোরই অপরাধ,
কেন জেগেছিল এত আশা সাধ!
যত ভালোবাসা, তত পরমাদ,
কেন ছুঁইলাম ফুল-শাখ।
অপরাধ শুধু মনে থাক!

আলেয়ার মতো নিভি, পুন জ্বলি,
তুমি এসেছিলে শুধু কুতূহলী,
আলেয়াও কাঁদে কারো পিছে চলি—
এ কাহিনী নব মুছে যাক।
অপরাধ শুধু মনে থাক!

আড়াল

আমি কি আড়াল করিয়া রেখেছি তব বন্ধুর মুখ?
না জানিয়া আমি না জানি কতই দিয়াছি তোমায় দুখ।

তোমার কাননে দখিনা পবন

এনেছিল ফুল পূজা-আয়োজন,

আমি এনু ঝড় বিধাতার ভুল-ভণ্ডুল করি সব,
আমার অশ্রু-মেঘে ভেসে গেল তব ফুল-উৎসব।

মম উৎপাতে ছিঁড়েছে কি প্রিয়, বক্ষের মণিহার?
আমি কি এসেছি তব মন্দিরে দস্যু ভাঙিয়া দ্বার?

আমি কি তোমার দেবতা-পূজার

ছড়ায়ে ফেলেছি ফুল-সস্তার?

আমি কি তোমার স্বর্গে এসেছি মর্তের অভিশাপ?

আমি কি তোমার চন্দের বুকে কালো কলঙ্ক-ছাপ?

ভুল করে যদি এসে থাকি ঝড়, ছিঁড়িয়া থাকি মুকুল,
আমার বরষা ফুটায়ছে তার অনেক অধিক ফুল!

পরায়ে কাজল ঘন বেদনার

ডাগর করেছি নয়ন তোমার,

কূলের আশয় ভাঙিয়া করেছি সাত সাগরের রানি,
সে দিয়াছে মালা, আমি সাজায়েছি নিখিল সুসমা ছানি।

দস্যুর মতো হয়তো খুলেছি লাজ-অবগুণ্ঠন,

তব তরে আমি দস্যু, করেছি ত্রিভুবন লুণ্ঠন!

তুমি তো জানো না, নিখিল বিশ্ব

কার প্রিয়া লাগি আজিকে নিঃস্ব?

কার বনে ফুল ফোটাবার লাগি ঢালিয়াছি এত নীর,

কার রাঙা পায়ে সাগর বাঁধিয়া করিয়াছি মঞ্জীর।

তুমি না চাহিতে আসিয়াছি আমি-সত্য কি এইটুক?

ফুল ফোটা-শেষে ঝরিবার লাগি ছিলে না কি উৎসুক?

নির্মম-প্রিয়-নিষ্ঠুর হাতে

মরিতে চাহনি আঘাতে আঘাতে?
তুমি কি চাহনি মিলনের মাঝে নিবিড় পীড়ন-জ্বালা?
তুমি কি চাহনি কেহ এসে তব ছিঁড়ে দেয় গাঁথা-মালা?
পাষাণের মতো চাপিয়া থাকিনি তোমার উৎস-মুখে,
আমি শুধু এসে মুক্তি দিয়াছি আঘাত হানিয়া বুকে!
তোমার স্রোতেরে মুক্তি দানিয়া
স্রোতমুখে আমি গেলাম ভাসিয়া।
রহিবার যে-সে রয়ে গেল কূলে, সে রচুক সেথা নীড়!
মম অপরাধে তব স্রোত হলো পুণ্য তীর্থ-নীর!
রূপের দেশের স্বপন-কুমার স্বপনে আসিয়াছিনু,
বন্দিনী! মম সোনার ছোঁয়ায় তব ঘুম ভাঙাইনু।
দেখো মোরে পাছে ঘুম ভাঙিয়াই,
ঘুম না টুটিতে তাই চলে যাই,
যে আসিল তব জাগরণ-শেষে মালা দাও তারি গলে,
সে থাকুক তব বক্ষে-রহিব আমি অন্তর-তলে।
সন্ধ্যা-প্রদীপ জ্বালায়ে যখন দাঁড়াবে আঙিনা-মাঝে,
শুনিও কোথায় কোন্ তারা-লোকে কার ক্রন্দন বাজে!
আমার তারার মলিন আলোকে
ম্লান হয়ে যাবে দীপশিখা চোখে,
হয়তো অদূরে গাহিবে পথিক আমারি রচিত গীতি-
যে গান গাহিয়া অভিমান তব ভাঙাতাম সাঁঝে নিতি।
গোধূলি-বেলায় ফুটিবে উঠানে সন্ধ্যা-মণির ফুল,
তুলসী-তলায় করিতে প্রণাম খুলে যাবে বাঁধা চুল।
কুন্তল-মেঘ-ফাঁকে অবিরল
অকারণে চোখে ঝরিবে গো জল,
সারা শর্বরী বাতায়নে বসি নয়ন-প্রদীপ জ্বালি
খুঁজিবে আকাশে কোন্ তারা কাঁপে তোমারে চাহিয়া খালি।
নিষ্ঠুর আমি-আমি অভিশাপ, ভুলিতে দিব না, তাই
নিশ্বাস মম তোমারে ঘিরিয়া শ্বসিবে সর্বদাই।

তোমারে চাহিয়া রচিনু যে গান
কণ্ঠে কণ্ঠে লভিবে তা প্রাণ,
আমার কণ্ঠ হইবে নীরব, নিখিল-কণ্ঠ-মাঝে
শুনিবে আমারি সেই ক্রন্দন সে গান প্রভাতে সাঁঝে!

BANGLADARSHAN.COM

নদীপারের মেয়ে

নদীপারের মেয়ে!

ভাসাই আমার গানের কমল তোমার পানে চেয়ে।
আলতা-রাঙা পা দু'খানি ছুপিয়ে নদী-জলে
ঘাটে বসে চেয়ে আছ আঁধার অস্তাচলে।
নিরুদ্দেশে ভাসিয়ে-দেওয়া আমার কমলখানি
হেঁয় কি গিয়ে নিত্য সাঁঝে তোমার চরণ, রানি?

নদীপারের মেয়ে!

গানের গাঙে খুঁজি তোমায় সুরের তরী বেয়ে।
খোঁপায় গুঁজে কনক-চাঁপা, গলায় টগর-মালা,
হেনার গুছি-হাতে বেড়াও নদীকূলে বালা।
শুনতে কি পাও আমার তরীর তোমায়-চাওয়া গীতি?
ম্লান হয়ে কি যায় ও-চোখে চতুর্দশীর তিথি?

নদীপারের মেয়ে!

আমার ব্যথার মালধে ফুল ফোটে তোমায়-চেয়ে।
শীতল নীরে নেয়ে ভোরে ফুলের সাজি হাতে,
রাঙা উষার রাঙা সতিন দাঁড়াও আঙিনাতে।
তোমার মদির শ্বাসে কি মোর গুলের সুবাস মেশে?
আমার বনের কুসুম তুলি পরো কি আর কেশে?

নদীপারের মেয়ে!

আমার কমল অভিমানের কাঁটায় আছে ছেয়ে।
তোমার সখায় পুজো কি মোর গানের কমল তুলি?
তুলতে সে-ফুল মৃগাল-কাঁটায় বেঁধে কি অঙ্গুলি?
ফুলের বুক দোলে কাঁটার অভিমানের মালা,
আমার কাঁটার ঘায়ে বোঝো আমার বুকের জ্বালা?

১৪০০ সাল

[কবি-সম্রাট রবীন্দ্রনাথের 'আজি হতে শতবর্ষ পরে' পড়িয়া]

আজি হতে শত বর্ষ আগে
কে কবি, স্মরণ তুমি করেছিলে আমাদের
শত অনুরাগে,
আজি হতে শত বর্ষ আগে!

ধেয়ানি গো, রহস্য-দুলাল!
উতারি ঘোমটাখানি তোমার আঁখির আগে
কবে এল সুদূর আড়াল?
অনাগত আমাদের দখিন-দুয়ারি
বাতায়ন খুলি তুমি, হে গোপন হে স্বপন-চারী,
এসেছিলে বসন্তের গন্ধবহ-সাথে,

শত বর্ষ পরে যথা তোমার কবিতাখানি
পড়িতেছি রাতে!
নেহারিলে বেদনা-উজ্জ্বল আঁখি-নীরে,

আনমনা প্রজাপতি নীরব পাখায়
উদাসীন, গেলে ধীরে ফিরে!
আজি মোরা শত বর্ষ পরে

যৌবন-বেদনা-রাঙা তোমার কবিতাখানি
পড়িতেছি অনুরাগ-ভরে।

জড়িত জাগর ঘুমে শিথিল শয়নে
শুনিতেছে প্রিয়া মোর তোমার ইঙ্গিত-গান
সজল নয়নে

আজো হয়

বারেবারে খুলে যায়

দক্ষিণের রুদ্ধ বাতায়ন,

গুমরি গুমরি কাঁদে উচাটন বসন্ত-পবন

মনে মনে বনে বনে পল্লব-মর্মরে

কবরীর অশ্রুজলে রেণি-খসা ফুল-দল

পড়ে ঝরে ঝরে!

ঝিরিঝিরি কাঁপে কালো নয়ন-পল্লব,
মধুপের মুখ হতে কাড়িয়া মধুপী পিয়ে পরাগ-আসব!

কপোতের চঞ্চুপুটে কপোতীর হারায় কূজন,
পরিত্যাগে বনবধু যৌবন-আরক্তিম কিংক-বসন!

রহিয়া রহিয়া আজো ধরণীর হিয়া
সমীর-উচ্ছ্বাসে যেন ওঠে নিশ্বসিয়া!

তোমা হতে শত বর্ষ পরে—

তোমার কবিতাখানি পড়িতেছি, হে কবীন্দ্র,

অনুরাগ-ভরে!

আজি এই মদালসা ফাগুন-নিশীথে

তোমার ইঙ্গিত জাগে তোমার সঙ্গীতে!

চতুরালি, ধরিয়াছি তোমার চাতুরি!

করি চুরি

আসিয়াছ আমাদের দুরন্ত যৌবনে,

কাব্য হয়ে, গান হয়ে, সিন্ধুকণ্ঠে রঙিলা স্বপনে।

আজিকার যত ফুল—বিহঙ্গের যত গান

যত রক্ত-রাগ

তব অনুরাগ হতে, হে চির-কিশোর কবি,

আনিয়াছে ভাগ!

আজি নব-বসন্তের প্রভাত-বেলায়

গান হয়ে মাতিয়াছ আমাদের যৌবন-মেলায়!

আনন্দ-দুলাল ওগো হে চির অমর!

তরুণ তরুণী মোরা জাগিতেছি আজি তব

মাধবী বাসর!

যত গান গাহিয়াছ ফুল-ফোটা রাতে—

সবগুলি তার

একবার—তা'পর আবার

প্রিয়া গাহে, আমি গাহি, আমি গাহি প্রিয়া গাহে সাথে!

গান-শেষে অর্ধরাতে স্বপনেতে শুনি
কাঁদে প্রিয়া, ওগো কবি ওগো বন্ধু ওগো মোর গুণী-
স্বপ্ন যায় থামি,
দেখি, বন্ধু, আসিয়াছ প্রিয়ার নয়ন-পাতে
স্বপ্ন যায় নামি!

মন লাগে, শত বর্ষ আগে
তুমি জাগো-তব সাথে আরো কেহ জাগে
দূরে কোন্ ঝিলিমিলি-তলে
লুলিত অঞ্চলে।
তোমার ইঙ্গিতখানি সংগীতের করুণ পাখায়
উড়ে যেতে যেতে সেই বাতায়নে ক্ষণিক তাকায়,
ছুঁয়ে যায় আঁখি-জল-রেখা,
নুয়ে যায় অলক-কুসুম,
তারপর যায় হারাইয়া,-তুমি একা বসিয়া নিব্ব্বুম!
সে কাহার আঁখিনীর-শিশির লাগিয়া
মুকুলিকা বাণী তব কোনোটি বা ওঠে মুঞ্জরিয়া,
কোনোটি বা তখনো গুঞ্জরি ফেরে মনে
গোপনে স্বপনে!

সহসা খুলিয়া গেল দ্বার,
আজিকার বসন্ত-প্রভাতখানি দাঁড়াল করিয়া নমস্কার!
শতবর্ষ আগেকার তোমারি সে বাসন্তিকা দূতী
আজি নব নবীনেরে জানায় আকুতি!...

কে-কবি-শাহান-শাহ! তোমারে দেখিনি মোরা,
সৃজিয়াছ যে তাজমহল-
শ্বেতচন্দনের ফোঁটা কালের কপোলে বালমল-
বিস্ময়ে-বিমুগ্ধ মোরা তাই শুধু হেরি,
যৌবনেরে অভিশাপি-‘কেন তুই শতবর্ষ করিলি রে দেরি?’
হায়, মোরা আজ
মোম্বাজে দেখিনি, শুধু দেখিতেছি তাজ!

শত বর্ষ পরে আজি, হে কবি-সম্রাট!
এসেছে নূতন কবি-করিতেছে তব নান্দীপাঠ!
উদয়াস্ত জুড়ি আজো তব
কত না বন্দনা-ঝক ধ্বনিয়া উঠিছে নব নব।
তোমারি সে হারা-সুরখানি
নববেণু-কুঞ্জ-ছায়ে বিকশিয়া তোলে নব বাণী।

আজি তব বরে
শত বেণু-বীণা বাজে আমাদের ঘরে।
তবুও পুরে না হিয়া ভরে নাকো প্রাণ,
শতবর্ষ সঁতারিয়া ভেসে আসে স্বপ্নে তব গান।
মনে হয়, কবি,
আজো আছো অস্তপাট আলো করি
আমাদের রবি!

আজি হতে শত বর্ষ আগে
যে-অভিবাদন তুমি করেছিলে নবীনেরে
রাঙা অনুরাগে,
সে-অভিবাদনখানি আজি ফিরে চলে
প্রণামী-কমল হয়ে তব পদতলে!

মনে হয়, আসিয়াছ অপূর্ণের রূপে
ওগো পূর্ণ, আমাদেরি মাঝে চুপে চুপে!
আজি এই অপূর্ণের কম্প কণ্ঠস্বরে
তোমারি বসন্তগান গাহি তব বসন্ত-বাসরে—
তোমা হতে শত বর্ষ পরে!

চক্রবাক

এপার ওপার জুড়িয়া অন্ধকার
মধ্যে অকূল রহস্য-পারাবার,
তারি এই কূলে নিশি নিশি কাঁদে জাগি
চক্রবাক সে চক্রবাকীর লাগি।
ভুলে-যাওয়া কোন্ জন্মান্তর পারে
কোন্ সুখ-দিনে এই সে নদীর ধারে
পেয়েছিল তারে সারা দিবসের সাথী,
তারপর এল বিরহের চির-রাতি,-
আজিও তাহার বুকের ব্যথার কাছে,
সেই সে স্মৃতির পালক পড়িয়া আছে।

কেটে গেল দিন, রাত্রি কাটে না আর,
দেখা নাহি যায় অতি দূর ঐ পার।
এপারে ওপারে জন্ম জন্ম বাধা,
অকূলে চাহিয়া কাঁদিছে কূলের রাধা।
এই বিরহের বিপুল শূন্য ভরি
কাঁদিছে বাঁশরি সুরের ছলনা করি!
আমরা শুনাই সেই বাঁশরির সুর,
কাঁদি-সাথে কাঁদে নিখিল ব্যথা-বিধুর।

কত তেরো নদী সাত সমুদ্র পার
কোন্ লোকে কোন্ দেশে গ্রহ-তারকার
সৃজন-দিনের প্রিয়া কাঁদে বন্দিনী,
দশদিশি ঘিরি নিষেধের নিশীথিনী।

এ পারে বৃথাই বিস্মরণের কূলে
খোঁজে সাথী তার, কেবলি সে পথ ভুলে।
কত পায় বুকে কত সে হারায় তবু
পায়নি যাহারে ভোলেনি তাহারে কভু।

তাহারি লাগিয়া শত সুরে শত গানে
কাব্যে, কথায়, চিত্রে, জড় পাষণে
লিখিছে তাহার অমর অশ্রু-লেখা।
নিরঙ্ক মেঘ বদলে ডাকিছে কেকা!
আমাদের পটে তারারি প্রতিচ্ছবি,
সে গান শুনাই-আমরা শিল্পী কবি।
এই বেদনার নিশীথ-তমসা-তীরে
বিরহী চক্রবাক খুঁজে খুঁজে ফিরে
কোথা প্রভাতের সূর্যোদয়ের সাথে
ডাকে সাথী তার মিলনের মোহনাতে।

আমরা শিশির, আমাদের আঁধি-জলে
সেই সে আশার রাঙা রামধনু বলে।

BANGLADARSHAN.COM

কুহেলিকা

তোমরা আমায় দেখতে কি পাও আমার গানের নদী-পারে?
নিত্য কথার কুহেলিকায় আড়াল করি আপনারে।
সবাই যখন মত্ত হেথায় পান করে মোর সুরের সুরা,
সবচেয়ে মোর আপন যে জন সে-ই কাঁদে গো তৃষ্ণাতুরা।
আমার বাদল-মেঘের জলে ভরল নদী সপ্ত পাথার,
ফটিক-জলের কণ্ঠে কাঁদে তৃপ্তি-হারা সেই হাহাকার!
হায় রে, চাঁদের জ্যোৎস্না-ধারায় তন্দ্রাহারা বিশ্ব-নিখিল,
কলঙ্ক তার নেয় না গো কেউ, রইল জুড়ে চাঁদেরি দিল্!

BANGLADARSHAN.COM

॥সমাপ্ত॥